

EUANGELIA IOANE DETARER.

¹ Abele Logo degraret, Ade dog abele Logo, a Ade Logo,

² E ko Ade dog degraret.

³ E ge gaire lu detagem eseamulu; a nole nerute lu, E nole atagem kak.

⁴ Eded abi dog; a eded gaire le daratkeda.

⁵ Abele be de daratkeda muige kupkupi ge; a kupkup nole arpeir kak.

⁶ Ege nerute le tabaruk, Ade de temariklu, nei atker Ioane.

⁷ E dali tabaruk ageakarem, abele lugem ko datki ageakarem, epe gaire le uridili odaratare abielam.

⁸ E dali nole abele datki, E tabaruk ko ageakarem datki penoka ekas.

⁹ Abele datki kar, ko daratkeare gaire le uridili, sepem tabarkare.

¹⁰ E geseb ge, a geseb abi atagemlam, a geseb nole abi ardar kak.

¹¹ E abara boai tabaruk, a abara boai nole abi agaret kak.

¹² Ui uridili abi egardare, a odaratarare abi nei de, E uiabim adigir nakuarare ko Ade ra omasker:

¹³ Uiaba nole mamlam aosos, a nole gem ra lag, a nole le ra lag, epe Adelam.

¹⁴ Logo depeger le gem ise, a E meribi dog emrilu, (a keriba abara zorom dasmerare, zorom

mokakalam Aba ra Uerem netat,) mitkar omare, a ageakar.

¹⁵ Ioane abi ageakarem, a ereretikri, kega, Idali kaka detautili, kega, Nerute le kari sorge ikas au kale kari tunge; abelegelam E kekiam, ka keubu.

¹⁶ Meriba uridili nagri no omare tumem no omare abi mitkarlam.

¹⁷ Abele gelar Mose de dekuarare, abele omare a ageakar tonar, Iesu Kerisolam.

¹⁸ Nole le Ade asmer kak; epe abara Uerem tepteb taba Aba ra marmot, E etomeret.

¹⁹ Ge Ioane de ageakarem peik, uiabi Iudaia giz gaire zogo le a gaire Leui namarida Ierusalem, ko abi itmerare, kega, Ma nete?

²⁰ E natomertare, a nole agem kak; a mamoro natomertare, kega, Kaka nole Keriso.

²¹ Uiaba abi itmerare, kega, Ma nete? Ma Elia ao? E etkalu, kega, Kaka nolea. Ma perofeta ao? E etkalu, Nolea.

²² Uiaba abi detagerare, kega, Ma nete? Ma natkar keribi uiabim tedautare keribi pe tedemarida. Nako mara mer marielam?

²³ E detaut, kega, Kaka kodo ereretikrili soge purge, kega, Barditugili Iehoua ra gab, mokakalam Isaia perofeta detauter.

²⁴ Uader Faresaio taramarkare.

²⁵ Uiaba abi itmerare, a abi detagerare, kega, Nalugem ma bapataiso, ese ma nole Keriso, a nole Elia, a nole nerute perofeta?

²⁶ Ioane uiabim etkalu, kega, Kaka bapataiso ni de; nerute uabi eipu ekuei uaba asmer kak,

²⁷ E dali kari sorge ikas au kale kari tumem, kaka nole abkoreb ko detue abara teter gab mukub.

²⁸ Abele gaire lu Bethabara ge ikerare, Ioridano ge sager pek, ge abele uteb ge Ioane de bapataiso.

²⁹ Iuoakaer, Ioane de Iesu dasmer abim tabakeam, a E detager, kega, A ma dasmer Ade ra Arenio, ko adem dikri gaire geseb uit!

³⁰ E dali kari atautilam, kega, Nerute le kari sorge ikas au kale kari tumge; abelelam E kekiam, ka keubu.

³¹ Kaka nole abi ardar kak; debele abi etomer Isaraela ibim, abelelam kaka tabaruk ko bapataiso ni de.

³² Ioane de ageakarem, a detager, kega, Kaka Lamar Zogo dasmer kotorlam tepelu dibadiba ise, a abi kerem ge egimulu.

³³ Kaka nole abi ardar kak: epe E dali kari tamarida ko bapataiso ni de, E kari natager, kega, Abele le ma dasmer Lamar Zogo ueeperoa abi kerem ge ueegimurua, E dali bapataiso Lamar Zogo de.

³⁴ Kaka dasmer, a kaka ageakarem, kega, Ade ra Uerem pedali.

³⁵ Iako iuaokaer, Ioane ekueilu, a neis abara kaimeg giz;

³⁶ E Iesu dasmer, ekasereder, E daratager, kega, Ua dasmeram Ade ra Arenio!

³⁷ Abele neis kaimeg abara mer aserei, ui darali Iesu irmilei.

³⁸ Iesu egreemalu, a dasmer ui darali abi irmili, a ui darali detagerei, kega, Nalu ua deraimerei? Ui natkalei abim, kega, Rabi (tonar, Ereuer le), ma nade emri?

³⁹ E ui darali detagerei, kega, Ua tabarkam, a dasmeram. Ui darali bakeamulei a dasmerei abara uteb, a abi kemem emrilei abele gerger ge: abelelam maike kige.

⁴⁰ Nerute le uiabelam Ioane aserei, a abi irmilei, pe Anederea, Simona Peteru ra keimer.

⁴¹ E kekiam erdalu abara keimer Simona, a abi detager, kega, Ki Mesaia erdali, (tonar abele nei, Keriso.)

⁴² E Iesuim egaredelu. Iesu abi dasmer, a detager, kega, Ma Simona Iona ra uerem; mari nei natkeri Kefa, (tonar abele nei, Peteru.)

⁴³ Iuaokaer, Iesu laglag Galalaiem bakeam, E Filipino erdalu, a abi detager, Kari narmili.

⁴⁴ Filipino Bethesaidalam, uteb Anederea a Peteru.

⁴⁵ Filipino de Nathaniela erdalu, a abi detager, kega, Keriba abi erdali Mose de abielam gelar ge, a gaire perofeta detar, Iesu Nazaretalam, Iosefa ra uerem.

⁴⁶ Nathaniela de abi detager, kega, Nako, umelo nerute debe lu ua tabakeamur Nazaretalam? Filipino abi detager, Ma tabakeam dasmer.

⁴⁷ Iesu Nathaniela dasmer abim tabakeam, a abi detager, kega, Dasmer, Isaraela kar, nole bes kak abi dog!

⁴⁸ Nathaniela abi detager, kega, Nade ma kari nasmer? Iesu etkalu, a abi detager, kega, Kaka mari nasmeli suke mudge, a Filipino nole mari abger kak.

⁴⁹ Nathaniela abim etkalu, kega, Rabi, ma Ade ra Uerem, a Isaraela ra Opole.

⁵⁰ Iesu etkalu, a abi detager, kega Ma oituli abelelam kaka mari natageri, kega, Kaka mari

nasmili suke mudge? mena ma keubu dasmer gaire au lu tumem abele.

⁵¹ Iesu abi detager, kega, Ageakar, ageakar kaka uabi detagereda, kega, Uarem uaba ko dasmerare kotor uanakesmur, a gaire Ade ra angela uatabatuer iako uabog tumem Le la Uerem.

2

¹ Abele gerger thri, nerute ispilu Kana Galilaiem; a Iesu ra apu pedali:

² Uiaba Iesu a abara kaimeg giz taraisare abele aspirem.

³ Uaina eseamulu, Iesu ra apu abi detager, kega, Uiaba nole uaina kak.

⁴ Iesu abi detager, kega, Kosker, nako ma karim? kara kerker nole uatabaruk.

⁵ Abara apu, uiabim gaire memeg le, daratagerare, kega, Abele mer E uabi detagereda, ikerare.

⁶ Peike sikis gaire baker tarpur, namer ko dirup irmili Iudaia le la tonar, tu me thri bathi absaimarsaimar.

⁷ Iesu uiabi detagereda, kega, Tedarakeusarare abele gaire tarpur niu. Uiaba tedarakeusarare mitkarem uadarabuerare.

⁸ E uiabi detagereda, kega, Ge tigrare, a ekadarare abim uetpur ra opole. Ege uiaba ekadarare.

⁹ Emetu uetpur ra opole tepdeskerare abele ni, depegemelu uaina, a nole umer kak nagelam, (gaire memeg le umele uiabi atatkolam,) uetpur ra opole le ispilu ereretikri,

¹⁰ A abi detager, Tonar gaire le uridili ko kekiam debe uaina dersemrare; a emetu au kase

ereare, ege kebi debe uaina nakuarare: ma mena debe uaina edagili, a peirdi.

¹¹ Abele degraretelu gaire Iesu ra adigir, E ikerare abele Kana ge Galilaia, a abi zorom etomelu; abara kaimeg giz abi odaratarare.

¹² Abele baruk E Kaperenaumem bakeamulu, Iesu, a abara keimer giz, a abara kaimeg giz: uiaba nole dordor gerger ab ged ge bamer.

¹³ Iudaia ra paseka maike, a Iesu bakeamulu Ierusalamem.

¹⁴ E nardarare gaire le zogo meta ge, uiaba kau, a mamoe, a dibadiba eraplare, a gaire le mani eraplare emereder.

¹⁵ E dordor kebi lager iskapsir, a uiabi adem mamuare zogo metalam, mamoe kem, a kau kem; a gaire le ra mani darapaitare, a gaire uiaba laulau dararaskilare.

¹⁶ A gaire le dibadiba eraplare, E daratagerare, kega, Taisare abele gaire lu; nole ikerare kara Aba ra meta lu garap meta.

¹⁷ Abara kaimeg giz dikiaporare abele mer emeret ge detarer, kega, Au laglag abele mara meta kari irmida.

¹⁸ Gaire Iudaia le natkartare, a abi detagerare, kega, Nalu atamelam ma keribi detomertare mama ikeli abele gaire lu?

¹⁹ Iesu uiabim etkalu, a detaut, kega, Eogerdi abele meta, kaka iako ikeli thri gerger.

²⁰ Gaire Iudaia le detagereda, kega, Fote sikis gaire urut abele meta ikeli, nako ma ko ikeli thri gerger ge?

²¹ Ege Iesu de detaut taba gem ra meta.

²² E emetu eded akaida eudelam, abara kaimeg giz dikiaporare abele mer E uiabi daratagerare: uiaba odaratarare abele Zogo mer detarer, gako nerute mer Iesu de detauter.

²³ E Ierusalem a ge abele uetpur ge paseka, abele gerger ge, gaire le abara nei odaratarare, abelelam uiaba dasmerare gaire abara atamelam E ikeli.

²⁴ Iesu nole tababu bamerik uiabim, abelelam E umele gaire le uridili,

²⁵ A abelelam nole abi abkoreb nerute le ko etomereti nerute le la tonar; abelelam E umele abele gaire lu muige le la nerkep ge.

3

¹ Abele nerute le Faresaio, nei Nikodemo, Iudaia tarim le:

² E ki ge Iesuim tabakeam, a abi detager, kega, Rabi, keriba umele ma ereuer le tarabu Adela: abelelam nole nerute le umele ikeli abele gaire atamelam mama ikeli, ese Ade nole abi dog.

³ Iesu etkalu, a abi detager, kega, Ageakar, ageakar, kaka mari natagere, Ese nerute le nole iako esmeda, E umer kak Ade ra baselaia dasmer.

⁴ Nikodemo abi detaut, kega, Nalugem aule umele ko eosmeda? nako E umele ko neisem badari taba apu kem ge, a iako esmeda?

⁵ Iesu etkalu, kega, Ageakar, ageakar, kaka mari natager, Ese nerute le nole esmeda ni de a Lamar de, E nole umer kak Ade ra baselaia badari.

⁶ Abele gemlam esmeda, gem pedali; abele Lamarlam esmeda, lamar pedali.

⁷ Nole amer kak abele mer kaka mari natagere, kega, Ido lu uaba iako esmerare.

⁸ Uag uami abele uteb E laglag, ma bumer asoli, a nole ardar kak E nagelam, a E nagedim bakeam: mokakalam gaire le Lamar de esmerare.

⁹ Nikodemo etkalu, a abi detager, kega, Nako umele gaire lu pedali?

¹⁰ Iesu etkalu, a abi detager, kega, Nako, ma Isaraela ereuer le, a nole erdali abele gaire lu?

¹¹ Ageakar, ageakar, kaka mari natager, kega, Keriba detagereda abele gaire lu keriba erdarda, a ageakarem abele gaire lu keriba dasmereda; epe uaba nole arpeir kak abele keriba ageakarem.

¹² Ese kaka uabi detagereda gaire lu geseb ge, a uaba nole oatur kak, nako uaba onatareda ese kaka uabi detagereda gaire lu kotor ge?

¹³ Nole nerute le ogi kotorem, epe mamoro E kotorlam uatabu, abele Le la Uerem kotor ge emri.

¹⁴ Mokakalam Mose taba armem agisilu abele soge purge, pako mokakalam Le la Uerem ko arem agisilu:

¹⁵ Epe gaire le abim onatareda, ko nagri eded akaida.

¹⁶ Abele absaimarsaimar Ade ra omare gesepem, gako E ikuar abara Uerem netate, epe nole eud kak, abele le abi oituli, mamoro E nagri eded aseamur kak.

¹⁷ Ade nole emarida abara Uerem gesepem ko gesep mer barditug; epe mamoro gesep eded abielam.

¹⁸ Abele le abi oituli nole mer barditug abim: abele le nole oatur kak emetu mer barditug

abim, abelelam E nole oatur kak abele nei Ade ra Uerem netate.

¹⁹ Abele mer barditug, datki gesepem tabarki, gaire le kupkup laglag tumem datki, abelelam uiaba dorge adud.

²⁰ Gaire le adud ikereda, uiaba datki derarteda, a nole datkim tabakeuare, uiaba dorge akmelam.

²¹ Gaire le ageakar ikereda, uiaba datkim tabakeuare, ko uiaba dorge paret kak, abele emetu ikereda Adim.

²² Abele gaire lu iobaru, Iesu a abara kaimeg giz bakeuare Iudaia gedim, E uiabi kemem bamer, a bapataiso.

²³ Ege Ioane ko Aionem bapataiso, abele maike Salim, abelelam au ni pedali: uiaba tabakeuare, a bapataisoem.

²⁴ Abelelam Ioane nole aziri kak au duhar meta.

²⁵ Ioane ra kaimeg giz a nerute uiaba Iudaia le giz basardare abele tonar ogarup.

²⁶ Uiaba Ioaneim tabakeuare, a abi detagereda, kega, Rabi, abele le mari dog, Ioridano apek, mama emetu abi ageakarem, dasmer, E ko bapataiso, a gaire le uridili abim tabakeuare.

²⁷ Ioane etkalu, a detager, kega, Nerute le umer kak ko nerute lu erpeilu, ese nole abi ikuar kotorlam.

²⁸ Uaba kari ageakarem, karielam detaut, kega, Kaka nole Keriso, epe kaka tamarida abi opem.

²⁹ Abele le kosker nagri emetu abim babeida, E dali ko ispida: abele le aspidar le la boai ekue, a abi asoli, au sererge abele le ispida ra kodo mer: abele kara sererge kemerkemer.

³⁰ E ko bataili, kaka ko ekeliki.

³¹ Le kotorlam uatabu, E tumem gaire lu uridili: le geseplam, E geseplam, a ko gesep mer atager: le kotorlam uatabu, E tumem gaire lu uridili.

³² Abele lu E emetu dasmer a asoli, E ageakarem peik; a nole le abara ageakarem erpei.

³³ Abele le abara ageakarem erpei, E dedkomet, kega, Ade ageakar.

³⁴ E dali Ade de temarida mer atagerem gaire Ade ra mer: abelelam E nole Lamar Zogo ikuar au tale lu ge de.

³⁵ Abet abele Uerem omare, a gaire lu uridili abi tagem aisuer.

³⁶ Abele le Ueremem oituli, E nagri eded aseamur kak: abele le nole Ueremem asor kak, E nole eded asmer kak, epe Ade ra urker abi tumge dikmerik.

4

¹ Opole umele gaire Faresaio aserare, kega, Iesu ko taraisare a bapataiso kaimeg giz tumege loane,

² (Epe Iesu nole bapataiso kak, mamoro abara kaimeg giz),

³ E Iudaia dekaelu, a iako Galilaiem bakeamulu.

⁴ Abara dorge ko eipu Samaria bakeamulu.

⁵ E nerute utebem Samaria tabarki, nei Sikara, maike abele kebi ged Iakobo de tabara uerem Iosefaim ikuar:

⁶ Iabobo ra ni peike. Iesu ni padige emri memelam, gem barapare: eipu gerger.

⁷ Nerute Samaria kosker tabaruk, ni atatkoem: Iesu abi detager, kega, Kari ni nakuar ko areem.

⁸ Abara kaimeg giz utebem bakeuare ko leuer arapem.

⁹ Samaria kosker abi detager, kega, Nako, ma Iudaia le, karim niem namosi, Samaria kosker? (Gaire Iudaia le a Samaria le nole meme kak.)

¹⁰ Iesu detaut, a abi detager, kega, Ese mama umele abele lu Ade ikuar, pako le dali mari natager, Kari ni nakuar; ese mama emetu abi damos, E ko mari nakuar eded ni.

¹¹ Ege kosker abi detager, kega, Kole, ma nole nisor kak, ni kopkopni: nagelam mari dog eded ni?

¹² Nako, ma aule tumem keriba aba Iakobo, abele ni keribi ikuar, E ko eri abele ni, a abara uerem giz, a abara ebur giz?

¹³ Iesu detaut, a abi detager, kega, Gaire le uridili ereare abele ni ge, uiaba iako niap ge:

¹⁴ Eko le aree abele ni kaka ikuar, E nole niap kak niai karem; abele ni kaka ko abi ikuar, mena abi kem ge ni tomeili eded aseamur kak.

¹⁵ Koskeret iako abi detager, kega, Opole, karim abele ni tekau, iako nole niap kak, iako kaka nole tabakeam ko ni tigur.

¹⁶ Iesu abi detager, kega, Bakeamu, mabara kimiar tegared, iako tabakeam.

¹⁷ Koskeret etkalu, kega, Kaka nole kimiar kak. Ege Iesu de abi detager, kega, Ageakar mama detaut, kega, Kaka nole kimiar kak:

¹⁸ Epe faif mara gaire kimiar; E dali mari dog emri, nole mara kimiar: peik ageakar mama detager.

19 Koskeret abi detager, kega, Kole, kaka erdali mama perofeta.

20 Keriba kaied abele paser ge esorerapare, ege uaba detager, Ierusalemema uteb kar esorerapare.

21 Iesu abi detager, kega, Kosker, kari asoli, kerker tabarki, uaba nole esorerapare Abem abele paser ge, a nole Ierusalemema ge.

22 Uaba umer kak uaba esorerapare nitim; ki umele abele keriba esoreraparem: Iudaia gizelam edede.

23 Kerker ia uatabu, a peirdi, gaire le esorerapare, ko Abem esorerapare lamarem, a ageakarem; abelelam Aba deraimer gaire le mokakalam ko abim esorerapare.

24 Ade Lamar; uiaba abim esorerapare, mamoro lamarem esorerapare, a ageakarem.

25 Kosker abi detager, kega, Kaka umele Mesaia ia uatabu (nei atker, Keriso:) E emetu tabi, E keribi detomereta gaire lu uridili.

26 Iesu abi detager, kega, Eko, kakanali mari mer atagere.

27 Abara kaimeg giz tabarki, a ezigmada, abelelam E koskerim mer detager; epe nole nerute le abi detager, kega, Nalu ma deraimer? a nalugem ma abi mer atagerem?

28 Kosker tabara nisor ikedilu, a utebem bakeamulu, a gaire le daratagerare, kega,

29 Tabakeuare, dasmerare abele le kari natagere gaire lu kaka ikeli: nako, Keriso dali?

30 Uiaba uteblam tabaosi, a abi dog tabarki.

31 Inoka dali, kaimeg giz abi ekailu, a detager, kega, Rabi, ero.

³² E uabi daratagerare, kega, Kara nagri leuer ko ero uaba nole umer kak.

³³ Abelelam kaimeg giz mer atager, kega, Nako, nerute le abi leuer ikuar?

³⁴ Iesu uabi detager, kega, Kara leuer ko ikeli abara lag, kari namarida, a ko eseamuda abara dorge.

³⁵ Nako, uaba nole detager, kega, Foa gaire meb nur tabarki? Dasmer, kaka uabi detager, kega, Uaba eti, a gaire gedub dasmer, nunur kerker nur abi.

³⁶ Le ikid bodomalam nagri, a leuer ageg etag ededem aseamur kak; ko le emor, a le ikid okakis sererge.

³⁷ Mokakalam, ageakar abele mer detaut, kega, Nerute le emor, a nerute ikid.

³⁸ Kaka uabi demarid ko ikid abele uaba sagim kak: uader le sagim, epe uaba barot uiaba sagim.

³⁹ Gaire Samaria le abi oituli abele uteblam, abele kosker merlam, kega, E kari natager gaire lu uridili kaka ikeli.

⁴⁰ Epe gaire Samaria le abi dog tabarki, uiaba abi damos uiaba kemem emri: E abele ge emri neis gerger.

⁴¹ Gaire uader le oituli abi merlam;

⁴² Uiaba koskerem detager, kega, Keriba nole oituli mara mer atautelam; abelelam keribibu asoli, a keriba umele, ageakar Keriso idali, geseb uridili ededem.

⁴³ Abele neis gerger iobaru, E bakeamaulu Galilaiem.

⁴⁴ Abelelam Iesu detager, kega, Perofeta nole ekosili abi ged ge.

45 E Galilaia tabarki, gaire Galilaia le abi egared, abelelam uiaba dasmer gaire lu E ikeli Ierusalem ge, abele uetpur ge; abelelam uiaba kemem uetpurim bakeam.

46 Iesu iako Kana Galilaia tabarki, abele uteb E ikeli ni iaueakai uaina. Nerute kole ra uerem gimjim Kaperenauma.

47 E asoli, kega, Iesu Galilaia tabarki Iudaialam, E abim tabakeam, a abim bali ko tabakeam abara uerem idigiri, abelelam E maike eumida.

48 Iesu abi detager, kega, Ese uaba nole asmer kak gaire atamelam pako adigir, uaba nole uatur kak.

49 Kolelut abi detager, kega, Opole, ma tabakeam, kara uerem ue eumi.

50 Iesu abi detager, kega, Bakeam, mara uerem eded akaida. Abele le oituli abele mer Iesu de abi detager, E bakeamulu.

51 E penoka ekas, abara memeg giz abi obapit, a abi detaut, kega, Mara uerem eded akaida.

52 E uiaba nautumer, abele hua E ko ditimeda ko eded. Uiaba abi detaut, kega, Ab gerger hua sefen, urueri abi dekaerti.

53 Baba umele abele hua, Iesu abi detager, kega, Mara uerem eded akaida: E pako abara boai uridili oituli.

54 Abele neisem adigiri Iesu ikeli, kerker ge tabarki Galilaia Iudaialam.

5

1 Abele gaire lu iobaru Iudaia le giz ra uetpur; Iesu Ierusalemam bakeam.

² Abele Ierusalem a ge nerute keper, maieke mamoe ra te, nei Heberu, Bethesda, faif bereg nagri.

³ Gaire le abele ge emri, le gim gim, a pone asamasam, a ibibi, a euselu, uiaba naokaili ni dakeili.

⁴ Kerker ge angela uatabu ni ge, ko ni dakeili; abele le kekiam bakmeida, ese emetu ni dakeili, abara gim dekaeda abele gim lam nagri.

⁵ Abele nerute le, therti eit urut E gim gim.

⁶ Iesu abi dasmer uteidilu, umele E emerete lam, E abi detager, kega, Nako ma lagelag eded?

⁷ Gim le abi detaut, kega, Kole, nole le kari nagaret keperem, ese ni dakeili: kaka beber nagemeli, penoka nerute kekiam abi.

⁸ Iesu abi detager, kega, Ekue, mabara sik ekau, a bakeam.

⁹ Sobkak abele le akaida, a abara sik ekau, a bakeam.

¹⁰ Abele gerger sabath ge. Abelelam Iudaia le giz nadgirda le detager, kega, Sabath peik, nole abkoreb marim ko ekau mabara sik.

¹¹ E uiabim detaut, kega, Abele le kari nadgiri, E kari natauti, kega, Mabara sik ekau, a bakeam.

¹² Uiaba abi itimer, kega, Nete le mari natauti, kega, Mabara sik ekau, a bakeam?

¹³ Le nadgiri umer kak nete; abelelam Iesu gumik bakeamulu, gaire le lakub lam.

¹⁴ Abele iobaru, Iesu abi dasmer muige zogo meta, a abi detager, kega Dasmer, emetu mari nadgiri; nole uit iako ikeli, iauaeakai nole nerute au uit marim tabarki.

¹⁵ Abele le bakeam, a gaire Iudaia le giz detager, kega, Iesu de abi idigiri.

16 Abelelam Iudaia le giz Iesu deskemrre, a deraimerare ko abi ipitare eumilu, abelelam E ikeli abele gaire lu sabath ge.

17 Ege Iesu uiabim detaut, kega, Kara Aba dorge ikeli, a peirdi, kaka ko dorge ikeli.

18 Abelelam Iudaia le giz au saserim ko abi ipitare eumilu, abelelam E nole sabath datupida tepteb, epe E iako detauti, kega, Ade abara Ab kar, pako E dali a Ade abkoreb.

19 Iesu detaut, a uiabim daratagerare, kega, Ageakar, ageakar, kaka uabi detagereda, Uerem umer kak tababu dorge ikeli, epe mamoro E Ab dasmer ikeli: gaire lu E ikerare, Uerem ko abele keli.

20 Abelelam Aba Uerem nas, a abi etomelu gaire lu E eker: E ko abi etomelu gaire au lu tumen abele, uaba ko damreda.

21 Mokakalam Aba gaire eud obakiam, a uiabi nadgirare; mokakalam Uerem nadgirare gaire le E laglag.

22 Ege Aba nole nerute le itmer, E emetu gaire itmer uridili ikuar Ueremem;

23 Eko gaire le uridili Uerem naospereda, mokakalam uiaba Aba naospereda. Abele le nole Uerem naospereda, E ko nole Aba naospereda, abi emariklu.

24 Ageakar, ageakar, kaka uabi detagereda, kega, Abele le kara mer asoli, a abi oituli kari namarida, E nagri eded aseamur kak, a nole itmer bau, E emetu bakeam eudelam ededem.

25 Ageakar, ageakar, kaka uabi detagereda, kega, Kerker ge maike uatabu, a peirdi, gaire eud

Ade Ueremer ra kodo mer asoli; uiaba asoli ko ededem.

²⁶ Mokakalam Aba eded nagri abi dog; mokakalam E Uerem ikuar ko nagri eded abi dog:

²⁷ Emetu abi ikuar adigir ko itmer, abelelam E Le la Uerem.

²⁸ Nole abele ezigmada; abelelam kerker uatabu, gaire le aolam ko asoli abara kodo mer,

²⁹ A ko obakiam; gaire debe lu ikeli, ededem obakiam; a gaire uit ikeli, eudem obakiam.

³⁰ Kaka nole umer kak nerute lu ikeli karababu; kaka itmer mokakalam kaka asoli: kaka barkak itmer, abelelam kaka nole kara lag deraimer, mamoro Baba ra lag, kari namarida.

³¹ Ese karababu karim ageakarem, nole ageakar kaka karim ageakarem.

³² Debele nerute karim ageakarem; kaka umele ageakar, abele mer E karim ageakarem.

³³ Uaba Ioaneim namarida, E ageakarem abele ageakar.

³⁴ Kaka nole egaret ageakar lelam: epe kaka detagere abele gaire lu, iaueakai uaba ko eded.

³⁵ E lamepa be, pako batoamerdi; uaba laglag sererge abele be abi dog kerker ge.

³⁶ Aule kara ageakarem tumem Ioane; abelelam gaire dorge Baba kari nakuar ko eseamuda, abele gaire dorge kaka ikeli, ko karim ageakarem, kega, Baba de kari namarida.

³⁷ Emetu kari ageakarem Baba de kari namarida. Uaba nole asoli abara kodo mer, epe abara nog uaba asmer kak.

³⁸ Abara mer nole uabi nerkep ge; abelelam uaba nole uatur kak abim, E namarida.

³⁹ Uaba deraimerare jauali zogo ge, abelelam uaba dikiapor uaba eded nagri aseamur kak abielam; abele karim ageakarem.

⁴⁰ Uaba obogai karim tabakeuare, ko eded nagri.

⁴¹ Kaka nole agaret kak naospili lelam.

⁴² Kaka uaba umele, nole uaba nerkep ge Ade ra lag.

⁴³ Kaka tabarki karba Aba ra nei ge, uaba nole kari agaret kak: ese nerute le tabarki taba nei ge, uaba ko abi agaret.

⁴⁴ Epe nako uaba ko oituli, uaba baospili egaret uabelam, a nole araimer kak naospereda Adalam tepteb?

⁴⁵ Nole akiapor kak kaka uaba detauti Abem; nerute ko uaba detaut, ege Mose, uaba abim oituli.

⁴⁶ Ese uaba Mose egaret, uaba kari ko nagaret, abelelam E kari naotali.

⁴⁷ Ese uaba nole egaret gaire jauali E detali, nako uaba egaret gaire kara mer?

6

¹ Abele iobaru, Iesu bakeam kei apek Galilaia keper ge, pe Tiberia.

² Gaire le netate gedim abi irmili, abelelam uiaba dasmerare gaire atamelam E ekere, tumem gaire gim le.

³ Iesu paserem ogi, a kemem emri abara kaimeg giz.

⁴ Paseka maike, nerute Iudaia giz ra uetpur.

⁵ Iesu etilu, a gaire le lakub dasmer abim tabakeuare, E Filipino detaut, kega, Meriba nage-lam leuer terapei, ko uiabi darasisiare?

⁶ E detager abele ko abi mirem: epe E umele abele lu ko ikeli.

⁷ Filipino abi detaut, kega, Nole uiaba abkoreb abele leuer terapei tu handed denari, iauaekai uiaba nagri kebi leuer mog.

⁸ Nerute abara kaimeg giz, pe Anederea, Simona Peteru ra keimer, abi detager, kega,

⁹ Nerute makeriam ike nagri faif areto kon, a neisi lar: epe nako dali uiabim gaire le lakub mokakalam?

¹⁰ Iesu detaut, kega, Gaire le bameri. Au soge dali. Epe gaire kimiar bameri, mokakalam faif thausan etag.

¹¹ Iesu gaire areto ekau; emetu esoao, E kaimeg giz naisuerare, a uiaba gaire le bamer naisuerare; a neisi lar ko, abkoreb uiaba lag.

¹² Uiaba kem osmeda, E abara kaimeg giz detager, kega, Gaire leuer mog etagarare, a nole nerute lu adem.

¹³ Uiaba etagerare, a gaire tuelf epei artare, abele gaire mog areto kon faif, kaier uiaba leuer aroem.

¹⁴ Emetu gaire le dasmer abele atamelam Iesu de ikeli, uiaba detager, kega, Ageakar, perofeta idali, emetu detaut ko uatabu gesepem.

¹⁵ Iesu umele uiaba ko elele abi egaret, ko abi ekairare opole, E iako gumik bakeamulu paserem.

¹⁶ Kikem, abara kaimeg giz keperem batueri;

¹⁷ A nar ge bateri, a atiem keper ge datuperti Kaperenauma ge. Ki ge, Iesu nole uiabi dog tabarki.

¹⁸ Keper au zauber au uaglam.

¹⁹ Emetu uiaba uzer mokakalam tuente faif a therti gaire setadia, uiaba Iesui dasmer tumem keper ge ekase, a maike nar ge: uiaba geum.

²⁰ E uiabi detaut, kega, Kakanali; uaba nole geum kak.

²¹ Uiabi sererge abi tigemertare nar ge ekauerertare; epe uiaba sobkak ia karida ab ged ge uiaba atiem.

²² Idim ge, gaire le lakub nerute apek ekue, a dasmer nole nar kak abele, epe abele nar tepteb abara kaimeg giz ekauerertare, Iesu nole uiabi kemem ekauererti nar ge, ege abara kaimeg giz tepteb atiem,

²³ (Gaire nar barkarki Tiberialam, maike abele uteb uiaba areto eroare iobaru Iesu de esoao):

²⁴ Emetu le lakub dasmerare Iesu nole akar pedali, pako abara kaimeg giz, uiaba gaire nar ge batiri, a Kaperenauma ge atiem, Iesu deraimerare.

²⁵ Uiaba abi erdali kei apek abele keper, uiaba abi detaut, kega, Rabi, ma ge tabarki na genger ge?

²⁶ Iesu uiabi detaut, kega, Ageakar, ageakar, kaka uabi detagereda, Uaba nole kari naraimeli abelelam uaba dasmer gaire atamelam, mamaro uaba areto eroarem, a kem osmeda.

²⁷ Nole sagim kak buzbuze leuer, epe mamoro niai leuer, a tabarki eded aseamur kak, Le la Uerem ko uabi ikuar; abelelam Baba, pe Ade, abi detakobi.

28 Uiaba abi detaut, kega, Nalu keriba dorge, ki ko ikeli Ade ra dorge?

29 Iesu uiabi detaut, kega, Ade ra dorge peik, ko oituli abim, E temarida.

30 Uiaba abi detaut, kega, Nalu atamelam mama ikeli, ki ko dasmer, a marim oituli? nalu mara dorge?

31 Keriba kaied mana erolare soge purge; mokakalam emetu detali, kega, E uiabi areto nakuarare kotorlam ko eroare.

32 Iesu uiabi detaut, kega, Ageakar, ageakar, kaka uabi detager, Mose nole areto uabi ikuar kotorlam; epe mamoro kara Aba uabi dekuarda areto kar kotorlam.

33 Abelelam Ade ra areto dali kotorlam tabi, a eded nakuarare gesepem.

34 Uiaba abi detaut, kega, Kole, keribi dekuarare areto dali.

35 Iesu uiabi detager, kega, Kaka eded areto: abele le karim tabakeam, E nole iako uererge: abele le karim oituli, E nole iako ni ap.

36 Kaka uabi detagereda, kega, Emetu uaua kari nasmereda, pe nole uatur kak.

37 Ui uridili Baba de kari nakuar ko karim tabakeuare; abele le karim tabakeam, kaka nole abi atua kak.

38 Abelelam kaka nole kotorlam tarabu ko ikeli kara lag, mamoro abara lag, E kari namarida.

39 Baba ra lag peike, kari namarida, kega, Kaka nole nerute dekaerti, E kari nakuar, epe kaka ko ekiamda keubu gerger ge.

40 Abara lag peike, kari namarida, kega, Gaire le uridili Uerem dasmerare, a abi oituli, uiaba

eded nagri aseamur kak: epe kaka ko uiabi nakiamda keubu gerger ge.

⁴¹ Iudaia le giz abi gumik mer atagere, abelelam E detaut, kega, Kaka areto kotorlam tarabu.

⁴² Uiaba detaut, kega, Nako, nole Iesu pedali, Iosefa ra uerem, pe nako, meriba nole umer kak abara aba a apu? nalugem E detaut, kega, Kaka kotorlam tarabu?

⁴³ Abelelam Iesu detaut, a uiabim detagereda, kega, Uaba nole gumik mer atager kak.

⁴⁴ Le nole umer kak karim tabakeam, ese nole abi egared Baba de, kari namarida: epe kaka ko abi ekiamda keubu gerger ge.

⁴⁵ Emetu detali gaire perofeta ge, kega, Ade de uiabi uridili nereuereda. Gaire le uridili asereda Babalam, a emetu nereuereda uiaba karim tabakeuare.

⁴⁶ Nole nerute le Baba dasmer, mamoro E Adalam, E Baba dasmer.

⁴⁷ Ageakar, ageakar, kaka uabi detagereda, kega, Abele le karim oituli, E nagri eded aseamur kak.

⁴⁸ Kaka eded areto.

⁴⁹ Uada kaied mana erolare sogge purge, uiaba baumer.

⁵⁰ Abele areto kotorlam tabu, ese le eroli, E nole eud kak.

⁵¹ Kaka eded areto kotorlam tarabu; ese le eroli areto peik, E ko eded niai karem: abele areto kaka ko ikuar, abele kara gem, kaka ko ikuar ueakai gesepem eded.

⁵² Iudaia le giz basaredelare, kega, Epe nalu le dali ko ikuar abara gem aroem?

53 Iesu uiabi detaut, kega, Ageakar, ageakar, kaka uabi detagereda, ese uaba nole eroli Le la Uerem ra gem, pako abara mam ere, uaba nole eded kak muige uaba nerkep ge.

54 Abele le kara gem eroli, pako kara mam ere, E nagri eded aseamur kak; epe kaka ko abi ekiamda keubu gerger ge.

55 Abelelam kara gem leuer kar, a kara mam ni kar.

56 Abele le kara gem eroli, a kara mam ereli, E muige kara nerkep ge, a kaka abi nerkep ge.

57 Mokakalam Baba eded kari namarida, a kaka ko eded Babalam: mokakalam abele le kari naroli, E ko eded karielam.

58 Abele areto kotorlam tarabu: nole mokakalam kaied giz erolare, gako baum: abele le areto idali eroli ko eded niai karem.

59 E abele gaire lu detagereda muige sunago, E nereuereda Kaperenauma ge.

60 Gaire abara kaimeg giz abele asarare, uiaba detager, kega, Beber abele mer; nete umele asoli?

61 Iesu umele, taba nerkep ge, abara kaimeg giz gumik mer atager abele, E uiabim detaut, kega, Nako, abele uabi bamsili?

62 Nako, ese uaba dasmer Le la Uerem abara emeret utebem ogi?

63 Lamar de idgiri, gem nole lu kar: abele gaire mer kaka uabi detagereda, lamar pedali, pako eded.

64 Uader uabelam nole oatur kak. Iesu umele gizlam uiaba nole oatur kak, a abele le abi keserkeser.

⁶⁵ E detaut, kega, Abelelam kaka uabi detagereda, le umer kak karim tabakeam, ese nole abi ikuar Baba de.

⁶⁶ Abele merlam, gaire abara kaimeg giz iako takomeda, a nole abi kemem bakeam.

⁶⁷ Iesu tuelf le detagereda, kega, Nako uaba ko laglag akomeda?

⁶⁸ Simona Peteru abi detaut, kega, Kole, nitim keriba bakeam? mari dog gaire eded mer aseamur kak.

⁶⁹ Ki oituli, a opasereret, mama Keriso, Ade ra Uerem niai eded.

⁷⁰ Iesu uiabi detaut, kega, Nako kaka uabi iterare tuelf le, a nerute uaba diabolo?

⁷¹ E Iudalam detager, Simona Isakariota ra uerem: abelelam E ko abi keserker, E nerute tuelf lelam.

7

¹ Abele gaire lu iobaru, Iesu Galilaiaem ekas: E nole la kak Iudaiaem ekas, abelelam Iudaia le giz deraimerare abi ipitare.

² Maike Iudaia le giz ra uetpur, abele nerazi meta uetpur.

³ Abara keimer giz abi detautare, kega, Ge dekaer, a Iudaiaem bakeam, ueakai mara kaimeg giz dasmerare gaire lu ma ikeli.

⁴ Ege nole le dorge mudige ikeli, ese E lagelag E natomertare. Ese mama ikeli abele gaire lu, mama natomertare gesepem.

⁵ Ege abara keimer giz nole abi oatur kak.

⁶ Iesu uiabim detautare, kega, Kara kerker ge nole tabarki; a peirdi uaba kerker.

⁷ Geseb nole umer kak uabi derarti; epe kari derarti, abelelam kaka uiaba adud dorge giz natomertare.

⁸ Uaba bakeauare abele uetpurem: peirdi kaka nole bakeam abele uetpur; abelelam kara kerker nole tabarki.

⁹ E emetu detager abele mer uiabim, E Galilaiem emri.

¹⁰ Abara keimer giz emetu uetpurem bakeamuda, E ko bakeam, epe E gumik ekas, nole paret kak ekas.

¹¹ Iudaia le giz, uetpur ge, abi deraimerare, a detautare, kega, E nade?

¹² Gaire le lakub abim basardare: uader detaut, kega, E debele; a uader, kega, Nolea, E gaire le didmirki.

¹³ Epe nole le abi paret kak detautare, uiaba Iudaia le giz geum.

¹⁴ Uetpur ge eipu, Iesu zogo metaem bakeamuda, a okadaraskeda.

¹⁵ Iudaia le giz damreda, a detaut, kega, Nalu le abele jauali umele, a nole ereuer kak?

¹⁶ Iesu uiabim detaut, kega, Nole karielam kara ereuere, epe abielam, kari namarida.

¹⁷ Ese nerute le lagelag abara lag ikeli, E ereuer akmer, nako Adela, nako kaka detaut karbabu.

¹⁸ Abele le tababu detaut, E deraimer tababu baospili: abele le deraimer ko abi despereda, abi emarida, E dali ageakar, nole barbar tonar abi dog.

¹⁹ Nako, Mose nole gelar uabi ikuar, a nole nerute uabelam gelar irmili? Epe nako uaba deraimer kari uanapitare?

20 Gaire le lakub abim detaut, kega, Demoni mari dog: niti de mari naraimeli mari uanapit?

21 Iesu uiabim detaut, kega, Kaka emetu nerute dorge ikeli, a uaba uridili damreda.

22 Mose peritom uabi ikuar, (epe nole Mosealam, mamoro kerem lelam;) uaba le peritom sabath ge.

23 Ese nerute le peritom erpei sabath ge, ueakai nole Mose ra gelar datupida; nako uaba kari urker abelelam kaka le idigiri sabath ge?

24 Nole erkepse irmi irmili pone, mamoro erkepse irmi irmili barkak itmer.

25 Eko uader le Ierusalem lam detaut, kega, Nako E dali uiaba deraimerare ko ipitare?

26 Dasmer, E paret kak mer detautili, a uiaba nole nerute mer abi detaut, Nako, gaire kole umele, kega, Keriso kar idali?

27 Epe meriba umele E nagelam; a Keriso tabarki, nole le umele E nagelam.

28 Iesu ereretiki zogo meta ge, E okadeskeda a detager, kega, Uaba kari umele, a uaba umele kaka nagelam; kaka nole karbabu tabarki, E ageakar, kari namarida, a uaba abi umer kak.

29 Kaka abi umele; abelelam kaka abielam, E kari namarida.

30 Uiaba deraimerare abi terpeirare: a nole le abim tag itirimuda, abelelam abara kerker nole tabarki.

31 Gaire lekublam abi oituli; uiaba detager, kega, Ese Keriso tabarki, nako, E ko ikeli gaire atamelam tumem E ikeli?

32 Gaire Faresaio asoli uiaba lekub abim basardare abele gaire lu; gaire zogo kemle a gaire

Faresaio namarida gaire asesered le abi terpeirare.

³³ Iesu uiabim detaut, kega, Teupai kaka uabi dog emri, kerker maike kaka abim bakeamulu, kari namarida.

³⁴ Uaba ko kari naraimereda, a nole kari ardar kak: abele uteb kaka bakeamulu, uabu umer kak ko bakeam.

³⁵ Gaire Iudaia le giz mer atager, kega, Nagedim E bakeam, a meriba nole abi ardar kak? nako, E ko bakeam uiabim gaire le bamarida Helene dog, a gaire Helene okadeskeda?

³⁶ Nalu abele mer, E detagereda, kega, Uaba kari naraimereda, a nole kari ardar kak: abele uteb kaka bakeamulu, uaba umer kak ko bakeam?

³⁷ Keubu gerger, abele au gerger uetpur ge, Iesu tekueilu, a ereretikri, a detager, kega, Ese nerute le niap, karim tabakeam ko aree.

³⁸ Abele le karim oituli, mokakalam zogo jauali detager, kega, Edede ni ko babusdarie abi nerkeplam.

³⁹ E detager abele Lamar Zogolam, uiaba gaire le abi oituli ko erpei abele. Lamar Zogo nole tabarki; abelelam Iesu nole eded akaida.

⁴⁰ Uader lekublam asoli abele mer, uiaba detager, kega, Ageakar, E perofeta pedali.

⁴¹ Uader datager, kega, E Keriso. A uader detager, kega, Nako, Keriso osmeda Galilaialam?

⁴² Nako, nole zogo jauali detager, kega, Keriso tabarki Daudalam, a Bethelemalam, abele Daida ra uteb?

⁴³ Abielam gaire le lakub barsardare.

⁴⁴ Uader uiaba lagelag abi terpei, a nole le abim tag itirimuda.

⁴⁵ Gaire asesered le akomeda gaire zogo kemle pako Faresaio giz; uiaba uiabim detaut, kega, Nalugelam uaba nole abi tegaret?

⁴⁶ Gaire asesered le detager, kega, Nole le mer egali mokakalam.

⁴⁷ Gaire Faresaio uiabim detaut, kega, Nako emetu uabi didmirki?

⁴⁸ Nako, nerute le abim oituli gaire opolelam, a gaire Faresaiolam?

⁴⁹ Abele nosik le gelar umer kak, ko eumida.

⁵⁰ Nikodemo uiabim detaut, (E Iesuim bakeam ki ge, E nerute uiabelam),

⁵¹ Nako, meriba gelar ra tonar ko kekiam bodomalam ikuar, a nole kekiam le itmer abele lu E ikeli?

⁵² Uiaba detaut, a abi detager, kega, Nako ma Galilaialam? Deraimer, a dasmer: nole perofeta dikedida Galilaialam.

⁵³ Uiaba uridili tabara uteb bamarida.

8

¹ Iesu Oliua paserem bakeamulu.

² Idim ge, Iesu iako zogo meta ge balu, gaire le lakub abim tabakeuare; E emri, a uiabim okadeskeda.

³ Uiaba aotale giz pako Faresaio giz abim tegaret nerute eruam kosker, emetu erpei kerker eruamlam; a eipu ekueirare,

⁴ A Iesuim detager, kega, Eruere le, abele kosker keriba eruamem terpei.

⁵ Emetu Mose keribi mer tigri, muige gelar, ko bakeru itimdare mokakalam: nako mara mer abim?

⁶ Uiaba detaut abele ge ko abi mirem, ueakai nagri mer ais abielam. Iesu esorgiru, a seb ge detali tagu.

⁷ Uiaba elele abi itmerare, E tekue, a uiabim detaut, kega, Debele le eruam kak kekiam bakeru abi itimdi.

⁸ E iako esorgiru, a seb ge detali tagu.

⁹ Uiaba emetu asoli, uiaba nerute a nerute eosmeda, ditimedada aule a mop ge itiagi: Iesu tepteb pako kosker eipu ekueilu.

¹⁰ Iesu etilu, a kosker tepteb dasmer, a abi detager, Kosker, uiaba nade marim mer ais? nako nole le mari bakeru natimdi?

¹¹ E detaut, kega, Opole, nolea kar. Iesu iako abim detager, kega, Ka ko nole mari bakeru natimili: bakeam; iako nole eruam kak.

¹² Iesu iako uiabim detaut, kega, Kaka geseb datki: abele le kari narmili E nole kupkupi ge bakeam, epe E nagri datki eded.

¹³ Faresaio giz abi detautare, kega, Mabu ma ageakarem; nole ageakar mara mer.

¹⁴ Iesu uiabim detaut, kega, Ese karababu kari ageakarem, kara mer ageakar; abelelam kaka umele kaka nagelam, a kai na gedim bakeam; uaba nole umer kak kaka nagelam, a kai na gedim bakeam.

¹⁵ Uaba erkepse irmi gem ge irmili; kaka nole nerute le erkepse irmi.

¹⁶ Ese kaka erkepse irmi, ageakar kaka erkepse irmi; abelelam kaka nole tepteb, epe kaka pako Baba, kari namarida.

¹⁷ Emetu detali muige uaba gelar, kega, Ageakar abele mer neisi le ageakarem.

¹⁸ Karbabu kari ageakarem, a Baba, kari namarida, kari ageakarem.

¹⁹ Uiaba abi detautare, kega, Mara Aba nade? Iesu detaut, Uaba nole kari umer kak, a kara Aba: ese uaba kari umele, uaba kara Aba umele.

²⁰ Abele gaire mer Iesu detaut mani epei ge, E zogo meta ge okadeskeda: a nole le abi terpei; abelelam abara kerker nole tabarki.

²¹ Iesu iako uiabim detaut, kega, Kai nabakeamulu, a uaba ko kari naraimerare, a uaba ko eumida uabi uitelam: uaba umer kak ko bakeam abele utebem kaka bakeam.

²² Iudaia le giz mer atager, kega, Nako, tababu ko abi ipit, abelelam E detager, kega, Uaba umer kak ko bakeam abele utebem kaka bakeam?

²³ E uiabim detaut, kega, Uaba lokodlam; kaka kotorlam: uaba geseplam; kai nole geseplam.

²⁴ Abelelam kaka uabi detager, kega, Uaba ko eumida uaba uitelam: ese uaba nole egaret Kakanali, uaba ko eumida uabi uitelam.

²⁵ Uiaba abi detautare, kega, Mama nete? Iesu uiabi detaut, kega, Pedali kaka uabi detager gizlam.

²⁶ Kaka nagri dordor lu ko detager, a ko dikiapor uabim: E ageakar, kari namarida; kaka gesepem detager gaire lu kaka asoli abielam.

²⁷ Uiaba nole akmer kak E Abaem uiabim detager.

28 Iesu uiabim detaut, kega, Ese uaba Le la Uerem armem tagis, uaba ko akmer kakanali, a kaka nole karbabu nerute lu ikeli, epe mokakalam Baba kari ereuerem, kaka detaut abele gaire lu.

29 E kari dog, kari namarida; E nole kari nakaerti; abelelam kaka gaire lu ikeli abim sererge.

30 E detager abele gaire lu, a gaire le abim oituli.

31 Iesu detager, uiabim gaire Iudaia le giz abim oituli, kega, Ese kara mer niaiem uabi dog, uaba kara kaimeg giz kar;

32 Uaba ko ageakar akmer, abele ageakar ko uabi emariklu.

33 Uiaba abi detautare, kega, Keriba Aberahama ra omasker, a nole didbare nerute le dog: epe nako ma detager, Keriba ko emariklu?

34 Iesu uiabim detaut, kega, Ageakar, ageakar, kaka uabi detager, kega, Abele le uit ikeli, E uite ra memeg le.

35 Abele memeg le nole uteb ge niaiem emri: mamoro uerem niaiem emri.

36 Ese Uerem uabi emariklu, uaba ageakar emariklu.

37 Kaka umele uaba Aberahama ra omasker; epe nako uaba deraimer kari ipit, abelelam kara mer nole uabi nerkep ge.

38 Kaka detager kaka dasmer kari Baba dog: a uaba ikerare abele gaire lu uaba asoli uaba abalam.

39 Uiaba abi detautare, kega, Aberahama keriba aba. Iesu uiabi detaut, kega, Ese uaba

Aberahama ra omasker, uaba ko ikeli Aberahama ra dorge.

⁴⁰ Peirdi uaba naraimer ko kari napit, nerute le uabi detager ageakar, kaka asoli Adela: Aberahama nole ikeli mokakalam.

⁴¹ Uaba ikeli uaba aba ra dorge. Uiaba abi detager, kega, Keriba nole eruam omasker; netate keriba Aba, Ade.

⁴² Iesu uiabim detaut, kega, Ese Ade uaba Aba, uaba ko kari lag: abelelam kaka nabue, a ge tabarki Adela; kaka nole karbabu tabarki, epe E kari namarida.

⁴³ Nako uaba nole akmer kak kara mer? Abelelam uaba umer kak kara mer asoli.

⁴⁴ Uaba uaba abalam diabolo, uaba lagelag uaba abara lag ikeli. E dipe le gizelam, a nole ageakar, abelelam nole nerute ageakar abi dog. Ese E bes mer detaut, E detaut tababelam; abelelam E besbes, a aba bes apu.

⁴⁵ Abelelam kaka ageakar detaut, uaba nole kari oatur kak.

⁴⁶ Nitide uabim kari uit natomerti? Ese kaka ageakar detaut, epe nako uaba nole kari oatur kak?

⁴⁷ Abele le Adela, Ade ra mer asoli: uaba nole asor kak, abelelam uaba nole Adela.

⁴⁸ Iudaia giz abi detaut, kega, Nako, keriba nole barkak detaut ma Samaria le, a demoni mari dog?

⁴⁹ Iesu detaut, kega, Kara nole nagri demoni; ege kaka kara Aba naospereda, a uaba kari nakekeli.

⁵⁰ Kaka nole deraimer karbabu naospereda: ege nerute le deraimer, a baraditug.

⁵¹ Ageakar, ageakar, kaka uabi detager, kega, Ese nerute le kara mer asoli, E nole eud asmer kak niai karem.

⁵² Iudaia giz abi detautare, Peirdi keriba umele mari dog demoni. Aberahama emetu eumida, pako gaire perofeta; a mama detager, kega, Ese nerute le kara mer asoli, E eud asmer kak niai karem.

⁵³ Nako, mama aule tumem keriba aba Aberahama emetu eumida? a gaire perofeta ko eumida: nete mama depegili?

⁵⁴ Iesu detaut, kega, Ese kaka karababu baospili, nole ageakar karababu naospili: kara Aba kari naospili; E dali uaba detaut uaba Ade;

⁵⁵ Uaba nole abi umer kak: kaka abim umele; ese kaka detaut, kega, Kaka nole abi umer kak, kaka iako besbes mokakalam uaba; epe kaka abim umele, a abara mer asoli.

⁵⁶ Uaba aba Aberahama sererge kara gerger dasmer; E emetu dasmer, E ko sererge.

⁵⁷ Iudaia giz abi detautare, kega, Maraurut nole fifeti, epe nako mama Aberahama dasmer?

⁵⁸ Iesu uiabim detaut, kega, Ageakar, ageakar, kaka uabi detager, Kakanali, Aberahama aosmer kak.

⁵⁹ Uiaba baker taisare ko abi itimdare: a Iesu gumik bakeamulu, a teosmelu zogo metalam.

9

¹ Iesu ekas idimirki, E dasmer nerute le sadamer kerker ge osmelu.

² Abara kaimeg giz abi nautmerare, kega, Rabi, nete adud, E dali, nako abara aba a apu, abelelam E esmelu sadamer?

³ Iesu detaut, kega, E nole adud, a abara aba a apu nolea: epe Ade ra dorge abi tumge etomeret.

⁴ Meriba dorge ko ikerare abara dorge, kari namarida, gerger ge; ki ko tabarki, nole le umer kak dorge ikeli.

⁵ Kaka geseb datki, abele kerker kaka geseb ge emri.

⁶ E emetu detager abele, E mos ekeilu gesepem, a sep mog detagem moselam, abara pone asauem,

⁷ A abi detager, kega, Bakeam, dirup Siloam keper (tonar abele nei, Namarida). E bakeam, a dirup, iako tabakeam mamoro dasmer.

⁸ Abara boai, pako gaire le, emeret abi dasmer sadamer, uiaba detager, kega, Nako nole E dali lugem bamos?

⁹ Uader detager, kega, Eko, E dali: a uader, kega, Nolea, E abi kaise. E detager, kega, Kakanali.

¹⁰ Uiaba abi detager, kega, Nako abele tonar mara neisi pone diski?

¹¹ E detaut, kega, Abele le, nei atker Iesu, sep mog detagem, a kara neisi pone asauem, a kari natager, kega, Bakeam Siloamem, a dirup: kaka bakeam, a dirup, epe kaka bakaerti.

¹² Uiaba abi detager, kega, E nade? E detaut, kega, Kaka umer kak.

¹³ Uiaba emeret sadamer le tegardare uiabim Faresaio giz.

¹⁴ Abele sabath ge Iesu sep mog detagem, a abara neisi pone diski.

¹⁵ Faresaio giz iako abim bautumer, kega, Nako tonar ma bakaerti? E uiabim detaut, kega, E sep

mog kara neisi pone asauem, kaka dirup, epe bakaerti.

¹⁶ Uader Faresaio giz detager, kega, Abele le nole Adela, E nole sabath irmili. Uader detaut, kega, Nako, adud le umele ikeli gaire atamelam mokakalam? Uiaba nakesmulu.

¹⁷ Uiaba iako sadamer detaut, kega, Nako mara mer abim, abelelam E mara neisi pone diski? E detager, kega, E perofeta.

¹⁸ Iudaia giz nole egaret abele tonar emeret E sadamer le, a peirdi bakaerti, uiaba kekiam abara aba a apu dabgeri,

¹⁹ A uiaba nautumer, kega, Nako, uaba uerem idali sadamer esmelu? Nalu tonarlam E bakaerti peirdi?

²⁰ Abara aba a apu uiabim detaut, kega, Ki umele keriba uerem peik, a E sadamer esmeda:

²¹ Epe ki umer kak nalugelam peirdi E bakaerti; a ki umer kak nete de abara neisi pone diski: E aule, abi itmer; E umele tababu detaut.

²² Abara aba a apu abele detaut, abelelam uiaba Iudaia giz geum: Iudaia giz netate mer, kega, Ese nerute le abi abeilu Keriso pedali, uiaba ko abi imuare sunagolam.

²³ Abelelam abara aba a apu detager, kega, E aule; abi itmer.

²⁴ Uiaba iako neisi dabgeri abele sadamer le, a abi detager, kega, Ade despili: keriba umele adud le dali.

²⁵ E detaut, kega, Ese E adud le, kaka umer kak: netate lu kaka umele, emeret kaka sadamer, a peirdi kaka bakaerti.

²⁶ Uiaba iako abi detaut, kega, Nalu E ikeli marim? nalugem E mara neisi pone diskilu?

²⁷ E uiabim detaut, kega, Kaka emetu uabi detager, a uaba nole asor kak: epe nako uaba lagelag ko abara memeg le?

²⁸ Uiaba adud mer abim, a detaut, kega, Mama abara memeg le; mamoro keriba Mose ra memeg le.

²⁹ Keriba umele Ade Mose detaut: epe ki umer kak nagelam abele le dali.

³⁰ Abele le uiabim detaut, kega, Dame lu peik, uaba nole umer kak E nagelam, a E emetu kara neisi pone diski.

³¹ Meriba umele Ade nole adud le asoli: ese nerute le Adim esorerapare, pako abara dorge ikeli, E ko abi asoli.

³² Netede asoli emeret ge nerute le umele diski neisi pone abele le sadamer teosmelu?

³³ Ese nole Adalam abele le, E nole umer kak nerute lu ikeli.

³⁴ Uiaba abi detaut, kega, Ma eosmeda uitelam, nako ma keribi okadeskeda? Uiaba abi imuare.

³⁵ Iesu asoli uiaba emetu abi imuare; E abi erdali, a abi detager, kega, Nako, ma Ade ra Uerem oituli?

³⁶ E detaut, kega, Opole, nete dali, ueakai kaka ko abi oituli?

³⁷ Iesu abi detaut, kega, Ma abi umele, a E dali mari mer atagere.

³⁸ E detaut, kega, Opole ae, kaka oituli. E abi esorgiru.

³⁹ Iesu detager, kega, Kaka geseb ge tabarki ko barditug, ueakai bakaerti gaire le asmer kak; epe gaire le dasmer ko sadamer.

⁴⁰ Uader Faresaio giz abi dog asoli abele, uiaba abi detautare, kega, Nako, keriba ko sadamer?

⁴¹ Iesu uiabim detaut, kega, Ese uaba sadamer, uaba nole adud nagri; epe uaba detager, kega, Keriba dasmer: uaba uit mena dali.

10

¹ Ageakar, ageakar, kaka uabi detager, kega, Abele le nole balu mamoe giz gab te ge, a ogi nerute gab ge, E eruam le, a lu gatkamer le.

² Abele le gab ge balu, E mamoe giz asesered.

³ Gab asesered le ko diski abim; ege gaire mamoe giz aserare abara kodo mer: E darabgerare gaire nei gaire abara mamoe, a uiaba adige tegaret.

⁴ Ese emetu gaire abara mamoe adige tegaret, E ko kekiam bakeam, a gaire mamoe abi irmili: abelelam uiaba akmer abara kodo mer.

⁵ Uiaba nole sub le irmili, epe abi derarti: abelelam uiaba akmer kak sub le giz ra kodo mer.

⁶ Iesu uiabim detaut abele mer babisdarie: epe uiaba nole akmer kak abara mer, E uiabim detaut.

⁷ Iesu iako uiabim detaut, kega, Ageakar, ageakar, kaka uabi detager, kega, Kaka mamoe giz ra te.

⁸ Gaire le uridili kekiam tabarki, uiaba gaire eruam le, a gaire lu gatkamer le: a gaire mamoe nole uiabim asoli.

⁹ Kai te nali; ese nerute le kari dog balu, E ko eded, ako balu, a eosmelu, a ko leuer nagri.

¹⁰ Ese eruam le tabarki, E tabarki ko eruam, a ko ipit eumilu, a lu gatkamer: kaka tabarki ueakai uiaba eded nagri, a ko au nagri.

¹¹ Kaka mamoe giz asesered le kar: abele le mamoro mamoe asesered, E abara eded ikuar uiabim mamoe giz.

¹² Abele le bodomalam erpei, a nole mamoe giz asesered le, a gaire mamoe nole tabara mamoe, E luko dasmer kei tabakeam, E gaire mamoe darakaertare, a koreder emerilu, epe gaire mamoe eregili luko de, uiaba kepu bamarida:

¹³ E koreder emerilu, abelelam E bodomalam erpeilu, E nole gaire mamoe dikiapor.

¹⁴ Kakanali mamoe giz asesered le kar; kaka umele gaire kara mamoe, a uiaba kari umele.

¹⁵ Mokakalam Baba kari nasmeli, abkoreb kaka Baba nasmeli; kaka ko ikuar karbaba eded uiabim gaire mamoe.

¹⁶ Kaka nagri uader mamoe, nole abele kalam: kaka ko a uiaba tegaret, a uiaba ko kara kodo mer aserare; iaueakai netate uteb gaire mamoe, a netate asesered le.

¹⁷ Ege kara Aba kari omare, abelelam kaka karbara eded ikuar, iako takalu.

¹⁸ Nole nerute le itke karielam, kaka karbabu ikuar: kara adigir nagri ko kara eded ikuar, a kara adigir nagri iako takalu. Abele gelar kaka erpei kara Abalam.

¹⁹ Gaire Iudaia le nakesmulu abele gaire merlam.

²⁰ Dordor uiabelam detaut, kega, Demoni abi dog, E paim paim; nalugelam uaba abi asoli?

21 Ege uader detager, kega, Nole demoni le la mer peike. Nako, demoni umele diski sadamer le la neisi pone?

22 Abele Ierusalem ge uetpur: dilik bar ge;

23 A Iesu ekas zogo meta, muige Solomona ra maisu ge.

24 Iudaia giz netate gedim abi derumeda, a abi detager, kega, Ma keribi bamsili naket gerger? Ese mama Keriso, paret kak keribim detaut.

25 Iesu uiabim detaut, kega, Kaka emetu uabi detagereda, uaba nole arpeir kak: abele gaire dorge kaka ikeli kara Aba ra nei ge, abele kari ageakarem.

26 Uaba nole arpeir kak, abelelam uaba nole kara mamoe giz.

27 Gaire kara mamoe asoli kara kodo mer, a kaka uiabi umele, a uiaba kari irmili:

28 A Kaka ko uiabim ikuar eded aseamur kak; a uiaba nole eud kak niai em niai karem, a nole le uiabi natkedarare kara taglam.

29 Kara Aba, aule tumem gaire lu uridili, E uiaba kari nakuar: a nole le umele uiaba natkedarare kara Aba ra taglam.

30 Kaka pako Aba, ki netat.

31 Iudaia giz baker tais ko abi itimdare.

32 Iesu uiabim detager, kega, Dordor gaire debe dorge kaka uabi detomereta karba Abalam; na dorgelam uaba kari bakeru natimeda?

33 Iudaia giz abi detaut, kega, Keriba nole mari bakeru natimeda debe dorgelam, epe aospilam; abelelam mama le, a mabu bakeli Ade.

34 Iesu uiabim detaut, kega, Nole uaba gelar aotar kak, kega, Kaka detaut, Uaba ade giz?

³⁵ Ese E emetu detager, kega, Uiaba gaire ade, uiabim gaire le Ade ra mer tabarki (a nole umer kak ko desak abele zogo mer detar),

³⁶ Nako, uaba detager abi abei abele Aba zogoem a gesepem namarida, kega, Ma baospili; abelelam kaka detager, kega, Kaka Ade ra Uerem?

³⁷ Ese kaka nole ikeli abele gaire kara Aba ra dorge, nole kari agaret kak.

³⁸ Ese kaka ikeli, a uaba nole kari agaret kak, debele gaire dorge egaret: iaueakai uaba umele a egaret kega, Aba karim muige, a kaka muige kara Aba.

³⁹ Uiaba iako deraimer abi terpei: ege E uiabelam ispilu uiaba taglam.

⁴⁰ E iako bakeamulu Ioridano apek, abele uteb Ioane de kekiam bapataiso; a abele ge E emri.

⁴¹ Gaire le abim tabakeauare, a mer atager, kega, Ioane nole ikeli nerute atamelam; epe ageakar gaire mer uridili Ioane de abi abeilu.

⁴² Gaire le abi oituli pedali.

11

¹ Nerute le gim gim, Lazaro Bethania le, Maria pako Maretha abi narbete ra uteb.

² Abele Maria Kole basao muro de, a tabara neisi teter itkir mus de, abara berbet gim gim, pe Lazaro.

³ Neisi abara berbet abim namarida, a detager, kega, Kole, ma dasmer E mama abi nasge, E gim gim.

⁴ Iesu asoli, a detager, kega, Nole niai eud abele gim, epe ko Ade despereda, iaueakai Ade ra Uerem despereda.

⁵ Iesu Maretha omare, a tabara keimer, a Lazaro.

⁶ E asoli E gimgim, E iako emri abele uteb neisi gerger.

⁷ Abele iobaru, E abara kaimeg giz detager, kega, Meriba iako bakeauare Iudaiaem.

⁸ Ege kaimeg giz abi detager, kega, Rabi, emeret ge Iudaia giz mari deraimer ko bakeru mari natimdare; nako ma iako bakeam abele?

⁹ Iesu detaut, kega, Nako, nole tuelf gaire hua gerger ge? Ese nerute le gerger ge ekas, E nole teter itur, abelelam E geseb datki dasmer.

¹⁰ Ese nerute le kige ekas, E ko teter itur, abelelam datki nole abi dog.

¹¹ Abele gaire lu E detaut: keubu abele, E uiabim detager, kega, Lazaro uteid, meriba boai; kaka bakeam iaueakai kaka abi itiri uteidelam.

¹² Abara kaimeg giz abi detaut, kega, Opole, ese E uteid, E iako eded.

¹³ Iesu abara eud detaut; uiaba dikiapor, kega, E detaut uteid, a nerezi.

¹⁴ Abelelam Iesu paret kak detaut uiabim, kega, Lazaro eumida.

¹⁵ Uabelam kaka sererge, abelelam kaka nole nali, iaueakai uaba oituli; epe mi nabakeauare abim.

¹⁶ Toma, nei atker, Didumo, tabara keme kaimeg giz detaut, kega, Mi ko nabakeauare, abi kemem eumilu.

¹⁷ Iesu tabarki, E dasmer foa gerger, E ao ge.

18 Bethania maike Ierusalem, mokakalam fiftin gaire setadia:

19 Dordor Iudaia le tabakeuare Marethaem a Mariaem, ui ko baimilei ui berbetlam.

20 Maretha asoli, kega, Iesu tabarki, E bakeam abim obapit: Maria penoka muige meta.

21 Maretha Iesu detager, kega, Kole, ese ma ge emri, kara berbet nole eud kak.

22 Peirdi kaka umele, gaire lu uridili ma damos Adalam, E ko mari ikuar.

23 Iesu abi detaut, kega, Mara berbet ko eded akaida.

24 Maretha abi detager, kega, Kaka umele E ko eded akaida abele keubu gerger.

25 Iesu abi detaut, kega, Kaka abele eded akaida, pako eded: abele le karim oituli, ese eud, E ko eded:

26 Abele le eded karielam, pako karim oituli, E nole eud kak niaiem niai karem. Nako, ma egaret abele mer?

27 E abi detaut, kega, Eko, Opole: kaka dikiapor mama Keriso, Ade ra Uerem, gesepem tarabu.

28 E emetu abele mer detaut, E bakeamulu, a Maria abara keimer gumik dabgeri, a detager, kega, Opole emetu tabarki, E mari dabgeri.

29 E abele asoli, E sobkak tekue, a abim bakeam.

30 Iesu nole uteb ge tabarki, E no emri abele uteb Maretha abi obapit.

31 Iudaia giz abi dog meta ge, abi baimida, uiaba dasmer Maria sobkak tekue, a adem bakeam, uiaba abi irmili, a detager, kega, E aoem bakeam ko ezoli abele.

³² Maria tabarki Iesu dog, a abi dasmer, E ekesmer abara teter ge, a abi detager, kega, Opole, ese ma ge emri, kara berbet nole eud kak.

³³ Iesu abi dasmer ezoli, a Iudaia giz abi kemem bakeam ko ezoli, E kemme nerezi, a okasosok,

³⁴ A detager, kega, Nade uaba abi ikederare? Uiaba detager, kega, Opole, tabakeam a dasmer.

³⁵ Iesu ezoli.

³⁶ Iudaia giz detaut, kega, Dasmer, E abim au omare!

³⁷ Epe uader detaut, kega, Nako, abele le sadamer le la neisi pone disk, E umer kak daisumda a nole eud kak abele le?

³⁸ Iesu iako taba nerkep ge nerezi, a aoem tabarki. Kur peik, baker te ge dimilu.

³⁹ Iesu detager, kega, Baker adem. Maretha, abara berbet eumida, detaut, kega, Opole, E simelag: ege foa abara gerger.

⁴⁰ Iesu abi detaut, kega, Nako, kaka nole mari natager, ese mama oituli, ma ko dasmer Ade ra adigir?

⁴¹ Uiaba baker adem uteblam eud le uteid. Iesu kotorem etilu, a detaut, kega, Baba, kaka marim esoao, abelelam ma kari asoli.

⁴² Kaka umele mama mena kari asoli: kaka emetu abele detager abelelam gaire le lakub derumeda, iaueakai uiaba ko egaret ma kari namarid.

⁴³ E emetu detaut abele, E elele ereretikri, kega, Lazaro, teosmeda.

⁴⁴ Epe eud le osmeda, abara teter pako abara tag emetu sopem irpi ualiu, a abara op sopem

irpi taelu. Iesu uiabim detaut, kega, Abi detue, a abi emariklu ko bakeam.

⁴⁵ Iudaia giz Mariaem tabaruda dasmerare gaire lu Iesu de ikerer, uader abi oituli.

⁴⁶ Epe uader uiabelam Faresaioim barkare, a uiabi daratagerare gaire lu Iesu de ikeli.

⁴⁷ Zogo kemle giz, pako Faresaio giz netate gedim ko mer atager, kega, Mi nako? abelelam gaire adigir abele le ikeli.

⁴⁸ Ese meriba abi dekaerti mokakalam, gaire le uridili abi oituli: epe gaire Roma tabarkare meriba ged, a meriba uteb uaditkamarare.

⁴⁹ Nerute uiabelam, nei Kaiafa, tarim zogo kemle abele urut ge, uiabim detager, kega, Uaba umer kak nerute lu,

⁵⁰ A nole akiapor kak, ido lu meribim nerute le ko eumida ab ged ra kes, a ged uridili nole eud kak.

⁵¹ E nole noge detaut ege: E tarim zogozogo le abele urut ge, E perofetaem, kega, Iesu ko eumida ab ged ra kes:

⁵² A nole ab ged ra kes tepteb, epe ko netate gedim gaire Ade ra uerem bamarida, iako netate uteb.

⁵³ Uiaba okaikes, a ditimeda abele gerger ge deraimer ko abi ipit eumida.

⁵⁴ Abelelam Iesu nole paret kak bakeam Iudaia ge, epe E bakeam abele ged maike sogge purge, nei Efaraima; a kemem emri abara kaimeg giz pedali.

⁵⁵ Iudaia giz ra paseka maike: gaire le bakeauare Ierusalemem ab gedelam ko kekiam tereiem, a keubu paseka.

⁵⁶ Uiaba Iesu deraimer, a etkemdare zogo meta muige, kega, Nalu uaua dikiapor? Nako, E uetpurem tabakeam?

⁵⁷ Uiaba gaire tarim zogozogo le, pako gaire Faresaio gelar ekos, kega, Ese nerute le umele abele uteb E emri, abara dorge ko etomeret, ueakai uiaba abi terpei.

12

¹ Sikes gaire gerger epe paseka akerare, Iesu Bethania tabarki, Lazaro dali, abele le eded akaida eudelam Iesu de.

² Uiaba abele leuer derser abim: Maretha memeg le; Lazaro uiabi kemem leuer ero abi dog.

³ Maria muro netate paun tekalu, lu kar, a Iesu ra neisi teter dedered, a itkir abi mus de: mitkar abele meta muro lag de.

⁴ Nerute abara kaimeg giz, nei Iuda Isakariota, Simona ra uerem, abele le ko abi keserkeser, E detager, kega,

⁵ Nalugelam nole terapei abele muro, bodomalam thri handed denari, ko ikuar gaire le lu kak?

⁶ E nole abele detaut abelelam E gaire le lu kak omare; epe E eruam le, a epei abi dog, E tais gaire lu arot.

⁷ Iesu detager, kega, Nole abi ekai; E abele ge ikedilu a ko tabarki abele gerger kari natkobei.

⁸ Gaire le lu kak mena uabi dog; kaka nole niaiem uabi dog.

⁹ Dordor Iudaia giz umele E abele ge emri: uiaba tabakeuare, nole Iesuelam tepteb, epe uiaba lagelag Lazaro ko dasmer, abele le eded akaida eudelam Iesu de.

10 Gaire tarim zogozogo le mer atager ko Lazaro ipit eumilu;

11 Abelelam gaire Iudaia bakeuare, a Iesu oituli abielam.

12 Iuaokaer, gaire le lakub uetpurem tabakeuare asoli, kega, Iesu ko tabakeam Ierusalemem,

13 Uiaba pama lislis taisare, a bakeuare abi obapit, a ereretikri, kega, Hosana: Isaraela Opole despili, Iehoua nei ge tabakeam.

14 Iesu nerute kebi asina erdalul, E abi tumge egimulu; mokakalam mer detali, kega,

15 Ma nole geum kak Ziona ra neur; dasmer, mara Opole tabakeam, asina ra uerem egimulu.

16 Abara kaimeg giz nole akmer kak abele gaire lu gizlam: epe emetu Iesu despereda, uiaba dikiapor, kega, Emetu detali abele gaire lu abielam, a emetu uiaba ikerare abele gaire lu abim.

17 Gaire le abi dog ageakarem E Lazaro dabgiri aolam, a abi eded akaida eudelam.

18 Abelelam gaire le lakub bakeuare abi obapit uiaba asoli E ikeli abele atamelam.

19 Abelelam Faresaio giz mer atager, kega, Uaba dasmer, uaba umer kak nerute lu; dasmer, geseb ge uridili abi irmili.

20 Uader Helene giz kemem gaire le uetpurem tabakeuare ko esorerapare:

21 Ui Filipinoim tabakeuare, Bethesaida Galilaia le, a abi eutumer, kega, Kole, ki lagelag Iesu dasmer.

22 Filipino bakeam a Anedereaim detager: epe Anederea a Filipinoim tabakeamulei, a Iesuim detaut.

²³ Iesu uiabim detaut, kega, Kerker idali, Le la Uerem despili.

²⁴ Ageakar, ageakar, kaka uabi detager, kega, Ese nerute kon kep nole seb ge abi, a uatuet, E tepteb ipe: ese E uatuet, E au turum.

²⁵ Abele le abara eded nasge, abele ko abi: epe abele le abara eded dedkoli geseb ge, E ko eded nagri aseamur kak.

²⁶ Ese nerute le kara memeg le, abara dorge kari narmili; abele uteb kaka emri, kara memeg le la uteb dali: ese nerute le kari memeg le, Baba de abi despili.

²⁷ Peirdi kara nerkep okasosok; nalu kaka ko detaut? Baba kari nakai abele kerkerlam. Epe abelelam kaka tabarki abele kerker ge.

²⁸ Baba, mabara nei despili. Ege kodo mer uatabu kotorlam, kega, Kaka emetu despili, kaka iako despili.

²⁹ Gaire le abele bako asoli, a detaut, kega, Girgir dali: uader detager, kega, Angela abi mer egali.

³⁰ Iesu detaut, kega, Abele kodo mer nole uatabu karim, epe uabim.

³¹ Peirdi dulam gesepem tabarki: peirdi ko adem imu geseb tarim le.

³² A kaka, ese kari nagaret armem geseblam, kaka ko eguatumur gaire le uridili karim.

³³ E abele ge detaut, ko etomeret abele eud ko abim tabarki.

³⁴ Gaire le abi detaut, kega, Keriba asoli gelarlam, kega, Keriso niaiem tekue: nalugelam mama detaut, kega, Ko armem egaret Le la Uerem? Nete Le la Uerem dali?

35 Iesu uiabim detaut, kega, Datki teupei uabi dog. Bakeuare kerker uaba datki nagri uabi dog, kupkupilam uabim tabarki: abele le ki ge degemili, E nole umer kak E na gedim bakeam.

36 Datki egaret kerker datki uabi dog, ueakai uaba datki ra uerem. Iesu abele detaut, E bakeamulu, a uiabelam ispilu.

37 E ikerare gaire adigir uiabi opem, epe uiaba nole abim oatur kak:

38 Ueakai eski abele mer Isaia perofeta de detaut, kega, Opole, nete de egaret keriba merkem? A neteim paret kak Iehoua ra tag?

39 Uiaba umer kak oituli, abelelam Isaia de iako detaut, kega,

40 E uiaba gaire pone darasamare, a uiaba nerkep imirida; ueakai uiaba nole asmer kak gaire pone de, a nole akiapor kak nerkep de, akomelam, a kaka uiabi nadgirare.

41 Abele Isaia de detaut, abelelam E abara zorom dasmer; E abi abeilu.

42 Gaire uiabelam tarim le abi oituli; epe uiaba nole etomeret kak gaire Faresaiolam, uiabi amulam sunagolam:

43 Abelelam lu kar uiabim despili lelam, tumem despili Adalam.

44 Iesu ereretikri, a detaut, kega, Abele le kari oituli, E nole kari oituli tepteb, epe abim kari namarida.

45 Abele le kari nasmili, E abi dasmer kari namarida.

46 Kaka nabue geseb datki, ueakai nole kupkup ge emri gaire le uridili karim oituli.

⁴⁷ Ese nerute le gaire kara mer asoli, a nole oatur kak, kaka nole abi itmer: abelelam kaka nole gesepem tabarki ko eutumer, epe gesepem ko ededem.

⁴⁸ Abele le kari natuaki, a nole kara mer egaret, abi dog dulam: abele mer kaka detaut, E dali abi dulam keubu gerger.

⁴⁹ Kaka nole karbabu detaut; epe Baba de kari namarida, E kari gelar nakuar abele lu kaka ko detager, a detaut.

⁵⁰ Kaka umele eded aseamur kak abara gelar; abele gaire mer kaka detager, abkoreb Baba de kari nataut, eko kaka detaut.

13

¹ Paseka nole aker kak, Iesu umele abara kerker tabarki ko bakeamulu geseplam tabara Abem, E emetu tabara boai omare gesepem, E uiabi omare, a mop ge tabarki.

² Kikem leuer ero, diabololo ikedi Iuda Isakariota ra nerkep, Simona ra uerem, ko abi keserkeser,

³ Iesu umele Aba de nakuar abi tagem gaire lu uridili, pako E Adalam, a E Adim iako bakeam,

⁴ Abelelam emetu leuer ero, E ekueda, a abara am uali adem; E mog uali esolu.

⁵ E ni epaitere ezerem, a ditimeda ko dedered abara kaimeg giz ra teter, a itkir mog uali de abi asodalam.

⁶ E Simona Peteruim toabukilu. E Iesuim detaut, kega, Opole, nako, ma kara neisi teter dedered?

⁷ Iesu abi detaut, kega, Abele lu kaka ikeli, ma umer kak peirdi; mamoro ma niaiem umele.

⁸ Peteru abi detaut, kega, Ma nole kara neisi teter dedered niai karem. Iesu abi detaut, kega, Ese kaka nole mari dedered, ma nole lu kak nagri kari dog.

⁹ Simona Peteru abi detaut, kega, Opole, nole kara neisi teter tepteb, epe kara neisi tag, a kara kerem ko.

¹⁰ Iesu abi detaut, kega, Abele le emetu dedered, nole lu kar iako abi dedered, epe neisi teter tepteb, ueakai kerkar eseamuda: uaba kerkar, epe nole uaba uridili.

¹¹ E opasereret abele le ko abi keserkeser: abelelam E detaut, kega, Uaba nole kerkar uridili.

¹² E emetu uiaba teter dedered, E iako tabara am uali tekalu, a iako emri, a uiabim detaut, kega, Nako, uaba umele abele lu kaka uabim ikeli?

¹³ Uaba kari nabei, Ereuere le, a Opole, uaba debe detaut, abelelam kakanali.

¹⁴ Ese kaka, Opole kar, a Ereuere le kar, a emetu uaba teter dedered, debele uaba uabu dedered uaba teter.

¹⁵ Kaka emetu tonar uabi dekuarda, ueakai uaba ikerare abkoreb kaka uabi ikeli.

¹⁶ Ageakar, ageakar, kaka uabi detager, kega, Memeg le nole aule tumem abara opole; a nole abele le namarida tumem abele le abi namarida.

¹⁷ Ese uaba umele abele gaire lu, debe mop uabim ua se ikerare.

¹⁸ Kaka nole uaba uridili detager: kaka umele gaire le kaka dabgered: ueakai bakedida mer detali kega, Abele le kari dog leuer ero, E emetu abara teter kari natiri.

¹⁹ Kaka uabi detager, a nole bakedida abele lu, ueakai ese bakedida, uaba ko dikiapor kakanali.

²⁰ Ageakar, ageakar, kaka uabi detager, kega, Abele le egaret le kaka namarida, E kari egaret: abele le kari egaret, E abi egaret, kari namarida.

²¹ Emetu Iesu abele detaut, abara lamar okasosok, E daratagerare, kega, Ageakar, ageakar, kaka uabi detager, nerute uabielam ko kari keserkeser.

²² Kaimeg giz erkepu baskare, uiaba kok bagagarare, nete de abeida.

²³ Nerute abara kaimeg giz, Iesu ra marmot ge uteidilu, Iesu abi nasge.

²⁴ Simona Peteru abim opu batimeda, a abi detager, kega, Keribi detager na le E detaut.

²⁵ E dali, Iesu ra marmot uteidilu, egreemalu a abi detager, kega, Opole, nete?

²⁶ Ege Iesu detaut, kega, Le dali kaka ko mog leuer ikuar, ese emetu akmeilu. E emetu mog leuer akmeilu, E ekalu a Iuda ikuar, Simona Isakariota ra uerem.

²⁷ Abele mog leuer iobaru, Satana abi nerkep balu. Iesu abi detaut, kega, Abele lu ma ko ikeli, elele ikeli.

²⁸ Nole nerute le, uiabielam kemem Iesu leuer ero, umele nalugelam E detaut abele mer abim.

²⁹ Uader dikiapor, abelelam Iuda dog epei, Iesu abi detaut, kega, Ma erapei gaire lu meribi koreb abele uetpur ge: nerute, ko ikuar uader lu uiabim gaire le lu kak.

³⁰ E emetu mog leuer erpeilu, E sobkak eosmelu; a ki ge.

³¹ E emetu eosmelu, Iesu detaut, kega, Peirdi, Le la Uerem despili, a Ade despili abielam.

³² Ese E Ade despili, Ade ko abi despili, a ko elele abi despili.

³³ Omasker, teupei kaka uabi dog. Uaba ko kari naraimili; mokakalam kaka Iudaia giz detaut, mokakalam kaka uabi detaut peirdi, kega, Abele uteb kaka bakeamulu, uaba umer kak ko bakeam.

³⁴ Kaka uabi ikuar kerkar gelar, kega, Uaba dorge ko uabu omare: mokakalam kaka uabi omare, abkoreb uaba omare uabu.

³⁵ Ese uaba uabu omare, gaire le uridili ko umele uaba kara kaimeg giz.

³⁶ Simona Peteru abi detaut, kega, Opole, ma na gedim bakeam? Iesu abi detaut, kega, Peirdi ma umer kak kari narmili; niaiem ma ko kari narmili.

³⁷ Peteru abi detaut, kega, Opole, nalugelam kaka umer kak mari narmili peirdi? Kaka ko ikuar kara eded mara kes.

³⁸ Iesu abi detaut, kega, Eko, ma ko ikuar mara eded kara kes? Ageakar, ageakar, kaka mari natagere, kega, kimiar faul nole ereretikri, ma ko kekiam thri kari nasared.

14

¹ Nole okasosok uaba nerkep: uaba Adim oituli, karim oituli ko.

² Dordor uteb kara Aba ra meta ge; ese nolea; kaka emetu uabi detagereda; abelelam kai nabakeamulu uteb derser uabim.

³ Ese ka nabakeamulu uteb derser uabim, kaka iako tarabue, uabi taisare karbabim: ueakai uaba kari kemem emri.

⁴ Uaba umele abele uteb kaka nabakeamulu, uaba gab umele ko.

⁵ Toma abi detager, kega, Opole, keriba umer kak ma na gedim bakeam; a nalugem keriba gab umele?

⁶ Iesu abi detaut, kega, Kaka gab, a ageakar, a eded; nole le Abem bakeam, ese nole gab kari dog.

⁷ Ese uaba kari umele, uaba kara Ab umele ko: peirdi uaba abi umele, a abi dasmer.

⁸ Filipino abi detaut, kega, Opole, keribi Abet detomereta, a sina.

⁹ Iesu abi detaut, kega, Nako, kaka emeret uabi dog, mama Filipino nole kari nasmeli? abele le kari nasmer, E kara Aba nasmeli; nako mama detaut, kega, Abet keribi detomereta?

¹⁰ Nako, ma nole dikiapor kak, kaka muige Abaim, pako Aba karim muige? Abele gaire lu kaka uabi detager, kaka nole karbabu detager; epe Baba kari muige, E ikeli abele gaire dorge.

¹¹ Kari nagaret, kaka muige Abaim a Aba kari muige: ese nolea, debele egaret dorgelam.

¹² Ageakar, ageakar, kaka uabi detager, kega, Abele le karim oituli, gaire dorge kaka ikeli, E ko ikeli: epe E ko au ikeli tumem abele, abelelam kaka nabakeamulu karba Abem.

¹³ Gaire lu uridili ua damsare kara nei ge, kaka ikeli abele, ueakai Aba despili Uermet.

¹⁴ Ese uaba lu damos kara nei ge, kaka ko ikeli.

¹⁵ Ese uaba kari lag, uaba ko kara gelar irmili.

16 Kaka ko Babim bali, ueakai E ko uabi ikuar nerute Upiatidar, ko uaba kemem emri niai karem,

17 Abele ageakar Lamar: gesep umer kak abi egaret; abelelam uiaba abi asmer kak, a nole abi akmer kak: epe uaba abi umele; abelelam E uabi dog emri, a E mena dali uabi nerkep ge.

18 Kaka nole uabi dikaer mokakalam ab kak a apu kak uerem giz; kaka ko uabim tabarki.

19 Menaba gesep nole kari asmer kak; epe uaba kari nasmerare: abelelam kaka eded, ua ko eded.

20 Abele gerger uaba ko umele, kega, Kaka muige kara Aba, a uaba muige kari dog, a kaka muige uabi dog.

21 Abele le kara gelar nagri, a abele irmili, E kari lag: abele le kari lag Baba abi lag, a ka ko abi lag a kari natomelu abim.

22 Ege Iuda (nole Isakariota) abi detaut, kega, Opole, nako mabu ko keribi detomertare, a nole gesepem ko?

23 Iesu abi detaut, kega, Ese le kari lag, E mena kara mer erpei: kara Baba ko abi lag, epe ki tabarki abim, a abi kemem emri.

24 Abele le nole kari lag, E nole kara mer erpei: abele mer uaba asoli nole kara mer, epe Baba de kari namarida.

25 Kaka emetu detaut abele gaire mer uabim, kaka mena uabi dog.

26 Abele Upiatidar, Lamar Zogo, Baba de ko namarida kari nei ge, E ko uabi dereuered gaire lu uridili, a ko uabim dikiaporare gaire lu uridili kaka uabi detager.

²⁷ Mapodan kaka uabi dog ikeli; kaka uabi ikuar kara mapodan: kaka nole uabi ikuar mokakalam gesep ikuar. Nole okasosok uaba nerkep, a nole geum.

²⁸ Uaba emetu asoli kaka uabi detager, kega, Kai nabakeamulu, kaka iako tabakeam uabim. Ese uaba kari lag, uaba ko sererge kara mer, kega, Kaka Abem nabakeamulu: abelelam kara Aba aule kari tumge.

²⁹ Peirdi kaka uabi detager, a nole bakedida, iaueakai ese bakedida, uaba ko egaret.

³⁰ Kaka nole iako perepere mer atager uabim, abelelam geseb tarim ko tabarki: a nole nerute abara lu kari dog;

³¹ Ueakai geseb umele kaka Babe lag, a kaka ikeli mokakalam Baba de kari mer tigri. Tekue, nabakeuare.

15

¹ Kaka uina kar, kara Aba uina paret le.

² E ko ismi gaire tam kari dog nole turum kak: a gaire tam turum turum E ko paret, ueakai au turum.

³ Uaba peirdi kerkar, kara merlam kaka uabi detager.

⁴ Uaba bameri kara nerkep ge, a kaka uabi nerkep ge emri. Mokakalam tam nole umer kak tababu turum, ese nole ekpi uina ge; a mokakalam uaba nole umer kak, ese nole kara nerkep ge bameri.

⁵ Kaka uina, uaua gaire tam: Abele le kara nerkep ge emri, a kaka muige abi nerkep, E dali ko au turum: abelelem uaba umer kak nerute lu ikeli ese kaka muriz ge.

⁶ Ese nerute le nole kara nerkep ge emri, debele abi adem ismi mokakalam tam, ueakai uatuet: gaire le etkemet, a urem dikri, a urem.

⁷ Ese uaba kara nerkep ge bameri, a kara mer uabi nerkep ge tarageri, ua ko damsare gaire lu uaba lagelag, ueakai ikeli uabim.

⁸ Babim despereda, ese uaba au turum turum; iauaekai uaba kara kaimeg giz.

⁹ Mokakalam Aba kari omare, abkoreb kaka uabi omare: kara omare ge niaiem tekue.

¹⁰ Ese uaba kara gelar irmili, uaba ko niaiem tekue kara omare ge: mokakalam kaka Baba ra gelar irmili, epe kaka niaiem tekue abi omare ge.

¹¹ Kaka emetu uabim detaut abele gaire mer, ueakai kara sererge niaiem tekue uabi nerkep ge, ueakai uaba sererge kemerkemer.

¹² Kara gelar peik, kega, Uaba ko omare uabu, mokakalam kaka uabi omare.

¹³ Ese nerute le abara eded ikuar taba boai bodomalam, nole nerute le la omare aule tumem ike.

¹⁴ Ese uaba ikeli gaire lu kaka uabi mer tigri, uaba kara boai.

¹⁵ Kaka nole iako uabi detager uaba memeg le giz; abelelam memeg le umer kak abele lu abara opole ikeli: kaka detaut uaba kara boai; abelelem gaire lu uridili kaka asoli kara Abalam, kaka uabi detomeret.

¹⁶ Uaba nole kari natarare, epe kaka uabi ditararda, a uabi depegereda, ueakai ua bakuare turum turum, a uaba turum niaiem tekue: ueakai Baba de ua dekuarare gaire lu uridili ua abi damsare kari neilam.

17 Kaka abele uabi mer tigri, iauaekai ua ko uabu omare.

18 Ege geseb ge uabi derar, uaba umele emetu kekiam kari derar, uaba keubu.

19 Ese uaba geseplam, geseb ko lagelag abara boai: abelelam uaba nole geseplam, epe kaka uabi depegerare geseplam, abelelam geseb uabi derar.

20 Dikiaporare kara mer kaka uabi detager, kega, Memeg le nole aule tumem abara opole. Ese uiaba emetu kari natkoli, uiaba ko uabi dedkoeda; ese uiaba emetu kara mer erpei, uiaba ko uaba mer erpei.

21 Abele gaire lu uridili uiaba uabim ikeli kara neilam, abelelam uiaba nole abi umer kak kari namarida.

22 Ese kaka nole tarabu ko uiabi daratagerare, uiaba nole uit kak: peirdi nole nerute lu ko uiaba uit batkamda.

23 Abele le kari naorar, E kara Abet naorarti.

24 Ese kaka nole ikeli gaire lu uiaba opem, nole nerute le ikeli, uiaba nole uit kak: peirdi uiaba kari nasmer, a kari naorti, pako kara Aba ko.

25 Iauaekai bakedida abele mer detali uiaba gelar ge, kega, Uiaba no kari naorarti.

26 Ese Upiatidar tabarki, kaka ko uabim emarida Abalam, pe ageakar Lamar, uatabu Abalam, E ko karim ageakar.

27 Uaba ko karim ageakar, abelelam uaba kari dog emri gizlam.

16

1 Kaka emetu uabi detager abele gaire lu, ueakai uaba nole mar bamarida.

² Uiaba ko uabi dituaki sunagolam: kerker ko tabarki abele le uabi ipitare, E ko dikiapor E Ade ra dorge ikeli.

³ Uiaba ko ikeli abele gaire lu, abelelam uiaba nole umer kak Aba, a kaka.

⁴ Kaka uabi detagereda abele gaire lu, ueakai kerker tabarki, uaba ko dikiaporauem kaka emetu uabi detaut. Kaka nole uabi detager abele gaire lu gizlam, abelelam kaka uabi dog emri.

⁵ Peirdi kai nabakeamulu abim kari namarida: nole nerute le uabelam kari eutumer, kega, Mai na gedim bakeam?

⁶ Uaba nerkep au okasosok, abelelam kaka uabi detager abele gaire mer.

⁷ Ege kaka uabi detager ageakar, kega, Debele uabim kaka bakeam: abelelam ese kaka nole bakeam, Upiatidar nole tabarki uabim: ese kaka bakeam, kaka ko abi emarida uabim.

⁸ E emetu tabarki, E ko geseb ge akmerem tonar uit, a barkak, a mer barditug:

⁹ Uitelam, abelelam uiaba nole karim oituli:

¹⁰ Barkaklam, abelelam kaka Babaim bakeam, uaba nole iako kari asmer kak:

¹¹ Mer bardituglam, abelelam emetu barditug geseb kole.

¹² Kara no nagri dordor lu ko uabi detager, epe peirdi uaba nole umer kak egaret.

¹³ Mamoro E tabarki, pe ageakar Lamar, E ko uabi eguatumur ageakar uridili: abelelam E nole tababu detaut: mamoro E ko detager abele gaire lu E asoli: uabi detomeret gaire lu ko tabarki.

¹⁴ E ko kari naospili: abelelam E ko tais karielam, a uabi detomertare.

15 Abele gaire lu Babi dog kara lu; abelelam kaka detaut, kega, E ko karielam tais, a uabi detomertare.

16 Menaba, uaba nole kari asmer kak: iako menaba, uaba ko kari nasmer; abelelam kai Abem nabakeamulu.

17 Uader abara kaimeg giz tababu mer atager, kega, Nalu E meribim detaut, kega, Menaba, uaba nole kari nasmer; iako menaba, uaba ko kari nasmer abelelem kai Abem nabakeamulu?

18 Uiaba detager, kega, Nalu E detaut, kega, Menaba? Meriba nole akmer kak abele mer E detaut.

19 Iesu umele uiaba laglag abim bautumer, E uiabim detaut, kega, Nako uaba uabu deraimer-are kara merlam detaut, kega, Menaba, uaba nole kari nasmer, iako menaba, uaba ko kari nasmer?

20 Ageakar, ageakar, kaka uabi detagereda, kega, Ua ko ebazoli, a okabatagereda, a geseb ko sererge: uaba ko okasosok, abele uaba okasosok ko depegili ko sererge.

21 Kosker maike esmelu E beber nerkep, abelelam abara kerker tabarki; emetu uerem esmelu, E nole iako dikiapor abele asiassi, abelelam E sererge nerute le geseb ge esmelu.

22 Peirdi, uaba nagri okasosok: kai iako uabi dasmer, ege uaba nerkep sererge, nole nerute le uabi sererge itker.

23 Abele gerger dali uaba nole nerute lu damos karielam. Ageakar, ageakar, kaka uabi detager, kega, Abele gaire lu uaba damos Babalam muige kara nei ge, E ko uabi dekuarare.

24 Emeret a peirdi, uaba nole damos nerute lu muige kara nei ge: debele damsare, a uaba ko egaret, ueakai uaba sererge mitkar.

25 Kaka emetu uabi detager abele gaire lu mer babisdarie: kerker ia uatabaruk, kaka nole uabi detager mer babisdarie, epe kaka ko uabim paret kak detaut Abem.

26 Abele gerger, uaba ko damos kara neilam: kaka nole uabi detager, kega, Kaka Abem damos uabim.

27 Aba uabi omare, abelelam uaba kari lag, a egaret, kega, Kaka Babalam.

28 Kaka nabue Babalam, a gesepem tabarki: kaka iako geseb dekaelu, a Abem bakeam.

29 Abara kaimeg giz abi detager, kega, Dasmer, peirdi, mama paret kak detaut, a nole mer babisdarie detaut.

30 Peirdi, keriba umele mama opasereret gaire lu uridili, nole lu kar marim nerute le ko marim eutumer: abelelam keriba dikiapor mama tarabu Adalam.

31 Iesu uiabi detaut, kega, Nako, peirdi, uaba dikiapor?

32 Dasmer, kerker ko tabarki, ia ike, uaba ko kepu bamarida boaiem, a kaka tepteb: nolea kaka tepteb, abelelam Aba kari dog.

33 Kaka uabi detager abele gaire lu, ueakai uaba mapodan nagri karielam. Uaba asiassi nagri geseb ge: ua ko saserim, kaka emetu geseb degmori.

17

¹ Iesu abele gaire mer detaut; a E kotor dimiru-
alu, a detaut, kega, Baba, kerker tabarki; mara
Uerem despili, ueakai Uermet mari naospili.

² Mokakalam mama abi sirdam ikuar tumem
gaire le uridili, ueakai E ko uiabi ikuar eded
aseamur kak, gaire le mama abi ikuar.

³ Abele eded aseamur kak, kega, Uiaba ko mari
nasmereda Ade kar netat, a Iesu Keriso mama
namarida.

⁴ Kaka emetu mari naospili geseb ge, kaka
emetu eseamuda abele dorge ma kari nakuar ko
akere.

⁵ Baba, peirdi, kari naospili mara kemem
zorom ge meribelam emeret ge, nole geseb kak.

⁶ Kaka emetu mara nei etomeret uiabim gaire
le mama kari nakuar geseplam: uiaba mara le,
mama uiaba kari nakuar: uiaba emetu mara mer
irmili.

⁷ Peirdi, uiaba umele marielam gaire lu uridili
ma kari nakuar:

⁸ Abelelam kaka emetu uiabim ikuar gaire mer
ma kari nakuar: uiaba emetu egaret, a uiaba
umele marielam kaka nabue, a uiaba egaret,
kega, Mama kari namarida.

⁹ Kaka uiabelam esorerapare: kaka nole es-
orerapare uiabelam gesepem, epe uiaba mama
kari nakuar, abelelam uiaba mara le:

¹⁰ A gaire kara lu uridili mara lu, a gaire mara
lu kara lu; kaka aule uiabelam.

¹¹ Peirdi, kaka nole geseb ge emri, epe uiaba
geseb ge emri, a kai marim nabakeamulu. Zo-
gozogo Aba, uiabi asesered mara nei ge, abele

uiaba ma kari nakuar, ueakai uiaba netat, meribi kaiser.

¹² Kaka mena uiabi dog geseb ge, kaka uiabi nasesered mara nei ge: kaka uiabi nasesered mama kari nakuar, nole nerute abi kak, eud uerem tepteb abi; ueakai bakedida abele zogo mer emetu detali.

¹³ Peirdi, kai marim nabakeamulu: kaka de-taut abele mer abele geseb ge, ueakai kara sererge bakedida uiaba nerkep.

¹⁴ Kaka emetu mara mer uiabim nakuarare; a geseb uiabi derarti, abelelam uiaba nole geseplam, mokakalam kaka nole geseplam.

¹⁵ Kaka nole mari namos ko uiabi egaret geseplam, epe mamoro mama uiabi nasesered adudelam.

¹⁶ Uiaba nole geseb le, kara kaiser nole geseplam.

¹⁷ Uiabim barkakem ikeli mara ageakar de; ageakar mara mer.

¹⁸ Mokakalam mama kari geseplam namarida, mokakalam kaka uiabi geseplam namarida.

¹⁹ Kaka karababu ikuar uiabim, ueakai, uiaba barkakem ikeli ageakar de.

²⁰ Kaka nole esorerapare uiabim tepteb, epe uiabim ko kari oituli uiaba merlam:

²¹ Ueakai ui uridili netat; mara kaiser Baba muige kara nerkep, a kaka muige mara nerkep ge, ueakai uiaba netat meribi koreb: ueakai geseb ko oituli ma kari namarida.

²² Abele zoromzorom ma kari nakuar, kaka emetu uiabi nakuarare, ueakai uiaba netat, meribi koreb netat:

²³ Kaka muige uiabi nerkep ge, a mama muige kara nerkep ge, ueakai uiaba netat: ueakai gesep umele mama kari namarida, a uiabi omare, abkoreb mama kari omare.

²⁴ Baba, kaka lagelag uiaba mama kari nakuar ko kari kemem emri kara uteb ge; ueakai uiaba kara zorom dasmerare abele mama de kari nakuar; abelelam ma kari omare emeret, a nole geseb aker kak.

²⁵ Geseb ge nole mari opasereret kak, Aba barkak: epe kaka mari opasereret, a uiaba umele mama kari namarida.

²⁶ Kaka emetu mara nei uiabim etomeret; kaka iako etomeret; ueakai omare nagri uiaba nerkep, abkoreb mama kari omare, a kaka muige uiaba nerkep ge.

18

¹ Iesu emetu detaut abele gaire mer, E pako abara kaimeg giz bakeuare dodo datuparare, nei Kederon, E pako abara kaimeg giz abele gedubem tabarki.

² Iuda, abi keserkeser, umele abele uteb: abelelam Iesu gaire bakeam abele uteb, kemem abara kaimeg giz.

³ Iuda taraisare gaire ares le, a gaire tarim le, uiabelam gaire zogo le, a gaire Faresaio, a kei tabarkare gaire lamepa kem, a gaire be kem, a gaire ares lu.

⁴ Iesu umele gaire lu ko abim tabarki, E maiem bakeamulu, a uiabim detager, kega, Netede uaba deraimerare?

⁵ Uiaba abi detaut, kega, Iesu Nazaret le. Iesu uiabim detaut, kega, Kai nali. Iuda, abi keserkeser, uiabi kemem bako.

⁶ Emetu Iesu detager, kega, Kai nali, uiaba bazik bakeuare, a seb ge bakesmer.

⁷ E iako uiabim eutumer, kega, Netede uaba deraimerare? Uiaba detaut, kega, Iesu Nazaret le.

⁸ Iesu detaut, kega, Kaka emetu uabi detagereda, kega, Kai nali: ese uaba kari naraimeli, uiabi namarkare, ko bakeuare:

⁹ Ueakai bakedida abara mer, kega, Nole nerute le abi uiabelam mama kari nakuar.

¹⁰ Simona Peteru nagri tebur ausos tulik, E iselu, a etaueriklu tarim zogozogo le ra memeg le, a abara tuter laip dikiam. Nei abele memeg Maliko.

¹¹ Iesu Peteru detager, kega, Mabara tebur ausos tulik iako sorge dasiri: nako, kaka nole are kak abele tanelu Baba de kari nakuar?

¹² Kole ra ares le giz, a Iudaia tarim le, Iesu terpeirare, a abi didbarare.

¹³ Kekiam uiaba abi tegaret Anaem; abelelam E Kaiafa ra naiuet, tarim zogo le abele urut ge.

¹⁴ Abele Kaiafa Iudaia giz daratagerare, kega, Debele netate le ko eumilu ab ged ra kes.

¹⁵ Simona Peteru, a nerute kaimeg giz abi irmilei: tarim zogozogo le opasereret abele nerute kaimeg giz, E Iesu dog balu tarim zogo le ra meta ge;

¹⁶ Peteru meta te ge tekueilu. Abele nerute kaimeg giz tarim zogo le opasereret, iako

teosmelu, a neur te asesered detaut, a Peteru muige tegaredilu.

17 Neur te asesered Peteruim detager, kega, Nako, ma nole nerute abara kaimeg giz? E detaut, kega, Kaka nole.

18 Gaire memeg le a gaire kole bako, a ur etoamerdare zirulam; a uiaba gebaugare: Peteru ui kemem, bako gebaugare.

19 Tarim zogo le Iesu eutumer uiabielam abara kaimeg giz, pako ereuer tonar.

20 Iesu abi detaut, kega, Kaka paret kak gesepem detaut; kaka sunago ge ereuerem, a zogo meta ge, Iudaia giz netate uteb ge; kaka nole nerute lu mude ge detaut.

21 Nalugem ma kari nautumer? uiabi nautumerare, gaire le kara mer aserare, kaka uiabi detagereda: dasmer, uiaba umele gaire mer kaka detaut.

22 E emetu abele ge detaut, nerute tarim le abele tekueilu Iesu tagu detapi, a detager kega, Nako, ma detaut mokakalam zogo kemleem?

23 Iesu abi detaut, kega, Ese kaka adud mer detaut, detomerti nalu adud: ese debe mer, nalugelam ma kari napit?

24 Ana abi didbari a emarida Kaiifaem, zogo tarim le.

25 Simona Peteru ekueilu ge bauger. Uiaba abi detager, kega, Nako, ma nole nerute abara kaimeg giz? E asared, a detaut, kega, Kaka nole.

26 Nerute zogo tarim le la memeg le, boai abele le Peteru abara laip dismilu, detaut, kega, Nako, kaka nole mari nasmer abi dog gedub ge?

27 Peteru iako asared: epe sobkak kimiar faul ereretikri.

28 Uiaba Iesu Kaiafaelam tagaret kot metaem, abele banega. Uiaba nole barot abele kot meta, ueakai uiaba nole uit kak, ko paseka eroli.

29 Pilato uiabim eosmeda, a detager, kega, Nako uaba mer ko aisare le idali?

30 Uiaba abi detaut, kega, Ese E nole adud ikeli, keriba nole abi emarik marim.

31 Pilato uiabim detaut, kega, Uaba abi egardare, a abi eutumer abkoreb uaba gelar. Iudaia giz abi detaut, kega, Nole keribim abkoreb ko le ipit eumida:

32 Ueakai Iesu ra mer bakedida, E emetu detager, a natomertare tonar eud E ko eumilu.

33 Pilato iako balu kot metaem, a Iesu dabgeri, a abi detager, kega, Nako, ma Iudaia giz ra Opole?

34 Iesu detaut, kega, Nako, mabu detager abele, ege nerute le mari natageri?

35 Pilato detaut, kega, Nako, kaka Iudaia le? Mara ged, a zogo tarim le giz mari namarida karim: nalu ma ikeli?

36 Iesu detaut, kega, Kara baselaia nole geseplam: ese kara baselaia geseplam, gaire kara kaimeg giz ko bares, ueakai nole kari emarik gaire Iudaiaem: peirdi, kara baselaia nole abele ge lam.

37 Pilato abi detager, kega, Nako, ma opole? Iesu detaut, kega, Ma detager kaka opole. Abelelam kaka naosmeda, abelelam kaka geseplam tarabu, ueakai kaka ko ageakar ageakarem. Gaire le uridili ageakalam kara kodo mer asoli.

³⁸ Pilato de abi detaut, kega, Nalu ageakar? Emetu abele detager, E iako osmeda uiabim gaire Iudaia le, a uiabim detager, kega, Kaka nole uit ardar kak abi dog.

³⁹ Epe uaba tonar ka ko uabim amariklu nerute le paseka kerker ge: nako, uaba lagelag ka ko uabim emarida Iudaia giz Opole?

⁴⁰ Uiaba iako au ereretikri, a detager, kega, Nole E dali, debele Barabasa. Ege Barabasa nerute eruam le.

19

¹ Pilato Iesu tegaret, a abi damrik.

² Gaire ares le zegerzeger aper euerare, a abi kerem ge amear, a abi dameare mam mam am uali;

³ A abim tabarki, a detaut, kega, Uaiiai, Iudaia giz Opole! Uiaba abi detapiare.

⁴ Pilato iako teosmelu, a uiabi detager, kega, Dasmer, kaka abi tegaret uabim, ueakai uaba dasmer kaka nole nerute uit ardar kak abi dog.

⁵ Iesu teosmeda, zegerzeger aper dameare, a mam mam am uali dameare. Pilato uiabi detager, kega, Le das!

⁶ Gaire zogo tarim le, a gaire asesered le abi dasmer, uiaba elele ereretikri, kega, Satauroem, satauroem. Pilato uiabim detaut, kega, Ua abi egardare, a satauroem: abelelam kaka nole nerute uit ardar kak abi dog.

⁷ Gaire Iudaia le abi detaut, kega, Keriba gelar nagri, abkoreb abele gelar E ko eumida, abelelam tababu akailu Ade ra Uerem.

⁸ Pilato abele mer asoli, E au geum;

⁹ E iako kot meta balu, a Iesuim eutumer, kega, Ma na gedelam? Iesu nole abim etkalu.

¹⁰ Pilato abi detager, kega, Nako, ma nole karim natkarti? ma nole umele kara nagri adigir ko mari satauroem, a kara nagri adigir ko mari emariklu?

¹¹ Iesu detaut, kega, Ese nole mari nakuar kotorlam, Ma nole adigir nagri kari tumge: abelelam au uit abele le kari nakuar marim.

¹² Abele ge lam Pilato deraimer ko abi emariklu: Iudaia giz elele ereretikri, kega, Ese ma abele le emarida, ma nole Kaisara ra boai: abele le tababu akailu opole, E Kaisara ra keubu le.

¹³ Pilato abele mer asoli, E Iesu adige tegaret, a kot bau ge emerilu, nei atker, Baker esegemelu, a Heberu kodo mer, Gabatha.

¹⁴ Kerker ge Paseka derser: mokakalam eipu gerger. E Iudaia giz detager, kega, Dasmer, uaba Opole!

¹⁵ Uiaba elele ereretikri, kega, Egardare, egardare, abi satauroem. Pilato uiabi detager, kega, Nako, kaka uaba Opole satauroem? Gaire zogo tarim le etkalu, kega, Keriba nole opole kak, Kaisara tepteb.

¹⁶ E abi emarik uiabim, ko satauroem.

¹⁷ Uiaba Iesu egardare: E osmeda tabara satauro tababu kodorum, a utebem bakeam, nei atker, Kerem lid ra uteb, Heberu nei, Gologotha:

¹⁸ Abele uteb ge, uiaba abi satauroem, neisi le abi kemem, nerute apek, a nerute apek, a Iesu eipu.

19 Pilato atamelam jauali detali, a tumem satauro dikmerik. Abele detali kega, IESU NAZARETA LE, IUDAIA LE GIZ RA OPOLE.

20 Dordor Iudaia giz abele jauali detagerare: abelelam maike au uteb abele uteb uiaba Iesu satauroem: emetu detali Heberu, a Helene, a Roma ra kodo mer.

21 Iudaia zogo tarim le Pilatoim detaut, kega, Nole autar kak, Iudaia giz Opole; epe tababu detager, kega, Kaka Iudaia giz Opole.

22 Pilato detaut, kega, Abele kaka detali, kaka detali.

23 Gaire ares le emetu Iesu satauroem, uiaba abara am uali ekadarare, a foa derapeir, abkoreb uiaba ares le; am uali kot ko: abele am uali kot nole adket kak, kemer kemer euer.

24 Uiaba mer atagere, kega, Meriba nole aspas kak, a debele lugulug deraimer niti ra lu: ueakai jauali bakedida, kega, Uiaba kara am uali derapeiare, a kara am uali kot lugulug ikeli. Abele gaire lu ares le giz ikeli.

25 Iesu ra satauro dege abara apu ekueilu, pako abara apu ra keimer, Maria, Kelopa ra kosker, a Maria Magadalena.

26 Iesu abara apu dasmer, pako abele kaimeg E nasge, maike tekueilu, E abara apu detager, kega, Kosker, dasmer mara uerem!

27 E ko detager abele kaimeg, Dasmer mara apu! Abele kaimeg abi tegaredelu abara uteb abele haua ge.

28 Abele iobaru, Iesu umele, kega, Gaire lu uridili eseemuda. Ueakai jauali bakedida, E detager, kega, Kaka ni ap.

29 Abele ge nerute tanelu, mitkar uinega: uiaba sab akmei uinega de, a hisop paikai ge dikmeriklu, a abara te ge agisilu.

30 Emetu Iesu uinega erpeilu, E detager, kega, Esemuda: E abara kerem esorgiru, a lamar emariklu.

31 Iudaia giz Pilatoim bareda ko uiaba teter erapei, a uiaba egardare, ueakai uiaba gem nole emerered sabath ge, (abelelam gerger derser, au gerger abele sabath.)

32 Uiaba gaire ares le tabakeuare, a kekiam le ra teter erapei, a nerute abi kemem satauro:

33 Epe uiaba Iesuim tabarki, a dasmer E eumida, uiaba nole abara teter arapeir kak:

34 Epe nerute uiaba gaire ares le abi ber ge dabu ekos, a sobkak mam a ni babuser.

35 Le ardali ageakarem, abara mer ageakar: E umele, ageakar E detaut, ueakai uaba oituli.

36 Emetu ikeli abele gaire lu, ueakai bakedida abele mer detali, kega, Nole arapeir kak nerute abara lid.

37 Nerute mer emetu detali, kega, Uiaba ko abi dasmer uiaba dab akoselam.

38 Abele iobaru, Iosefa Arimathea le, nerute Iesu ra kaimeg, E gumik abelelam E Iudaia giz geum, a Pilatoi damos ko Iesu ra gem tegaret: ege Pilato emarik. E tabakeam, a Iesu ra gem egaret.

39 Nikodemo ko tabakeam, abele le ki ge Iesuim bakeam, E muro tais a alo atapetem, mokakalam uan handed paun beber.

⁴⁰ Uiaba Iesu ra gem egardare a uali lino de sopem, kemem gaire debe lagelag lu, mokakalam Iudaia giz ra tonar etkobei.

⁴¹ Abele gedub ge, uteb uiaba Iesu satauroem, nagri kerkar ao, nole eud le akedir kak.

⁴² Uiaba Iesu abele ge ikedilu, abelelam gerger ge derser uiaba Iudaia le, (epe ao maike.)

20

¹ Kekiam gerger sefen, Maria Magadalena tabakeam, bane ge, aoem, a baker dasmer, emetu adem aolam.

² E koreder emerilu, a Simona Peteruim tabarki, pako nerute memeg le Iesu nasge, a uiabi daratager, kega, Uiaba emetu Opole egaret aolam, keriba umer kak nade uiaba abi ikedi.

³ Peteru, pako abele nerute kaimeg osmelei, a bakeamulei aoem.

⁴ Ui koreder emerilei: nerute kaimeg Peteru esaimeda, a ao ge kekiam tabarki;

⁵ E diketilu, a uali dasmer ipe; E nole bao.

⁶ Simona Peteru ko tabarki, abi irmili, a ao ge balu; a uali lino dasmer ipe,

⁷ Pako mog uali abara kerem sopem, nole netate ipe kemem uali lino, tepteb ipe nerute uteb nole atarat kak.

⁸ Nerute kaimeg balu ko, abele le kekiam aoem tabarki, E ko dasmer, a oituli.

⁹ Uiaba nole akmer kak abele mer detali, kega, Abkoreb abim iako eded akaida eudelam.

¹⁰ Neisi kaimeg iako tabara uteb bakeamudariei.

¹¹ Maria tekue adige ao ge ezoli: E tegreamalu a ezoli, a dasmer muige abele ao ge;

12 E neisi angela dasmer, zazer uali darame eder emrilei, nerute kerem ge, a nerute teter ge, abele uteb Iesu ra gem ikedilu.

13 Uiaba abi detager, kega, Kosker, nalugem mama ezoli? E uiabim detaut, kega, Abelelam uiaba kara Opole egareda, kaka umer kak abele uteb uiaba abi ikedarare.

14 Emetu abele detager, E egreamalu, a Iesu dasmer tekue, E nole umer kak Iesu pedali.

15 Iesu abi detaut, kega, Kosker, nalugem ma ezoli? ma niti deraimeri? E dikiapor E gedub paret arup le, E abi detaut, kega, Kole, ese mama abi egaret, kari natager abele uteb mama abi ikedi, ueakai kaka ko abi agaretelu.

16 Iesu abi detager, kega, Maria. E tegreamalu a abi detager, kega, Raboni: tonar, Ereue le.

17 Iesu abi detaut, kega, Nole kari atutir kak; abelelam kaka nole karba Babim ogi: bakeamulu uiabim kara keimer giz, a uiabi daratagerare, kega, Kaka Abem pako uaba Aba ogi, kara Ade a uaba Ade.

18 Maria Magdalena kei bakeamulu, a kaimeg giz daratagerare, kega, Kaka emetu Opole dasmer; pako tonar E emetu detager abele abim.

19 Ki ge abele gerger, kekiam gaire sefen, emetu demare gaire te abele uteb uiaba netate gedim, abelelam uiaba Iudaia le geum ge, Iesu tabakeamulu a eipu ekueilu, a uiabi detager, kega, Mapodan uabim.

20 Emetu abele detager, E abara neisi tag a abara ber uiabi natomelu. Abara kaimeg giz sererge Opole dasmer.

²¹ Iesu iako uiabi detager, kega, Mapodon uabim: kaka uabi namarida mokakalam Baba kare namarida.

²² E emetu abele detager, E uiabim nerezi, a detager, kega, Lamar Zogo egaret:

²³ Abele gaire le la uit uaba ko emarik, abele ko uiabim emarik: abele uaba dekaer, abele ko dekaer.

²⁴ Toma, nerute tuelf lelam, nei atker Didumo, nole uiabi dog kerker Iesu tabarki.

²⁵ Kaimeg giz abi detager, kega, Keriba emetu Opole dasmer. E uiabim detaut, kega, Ese kaka nole dasmer sok tulik ziz abara neisi tag, a kara baur kei sok tulik ziz ge aziriklu, a kara tag abara ber ge aziriklu, kaka nole uatur kak.

²⁶ Gaire gerger eit iobaru, abara kaimeg giz muige meta, a Toma uiabim kemem. Gaire te emetu demare, Iesu batimedilu, a uiabim eipu ekueilu, a detager, kega, Mapodan uabim.

²⁷ E Toma detager, kega, Mabara baur kei tekau, a dasmer kara neisi tag; a mabara tag tekau, a kara ber ge aziriklu: ma nole uatur kak, debele oituli.

²⁸ Toma abi detaut, kega, Kara Opole, a kara Ade.

²⁹ Iesu abi detaut, kega, Toma ma oituli abelelam ma kari dasmer: uiaba uerkab le gaire le oituli, a nole asmer kak.

³⁰ Dordor atamelam Iesu ikelare opem abara kaimeg giz, a nole detali abele jauali ge:

³¹ Emetu abele gaire lu detali ueakai uaba dikiaporauem, kega, Iesu Keriso kar, Ade ra Uerem: ueakai uaba onatereda, uaba ko eded nagri abi neilam.

21

¹ Abele lu iobaru, Iesu iako tababu natomertare uiabim kaimeg giz, Tiberia keper ge; abele tonar tabara natomertare.

² Netate gedim Simona Peteru, a Toma, nei atker Didumo, a Nathaniela, Kana Galilaia le, a neisi Zebedαιο ra uerem, a neisi abara kaimeg giz.

³ Simona Peteru uiabi detager, kega, Kai nabakeamulu net asaperem. Uiaba abi detaut, kega, Ki ko nabakeuare mari kemem. Uiaba bakeuare, a nar ge ekauererti; abele ki ge, uiaba nole lar kak.

⁴ Ege idim ge, Iesu tauer ge tekueilu: kaimeg giz nole umer kak Iesu dali.

⁵ Iesu uiabi detager, Kega, Omasker, nako, uaba leuer nagri? Uiaba abi detaut, kega, Nolea.

⁶ E uiabim detager, kega, Net dikri nar tuter peik, a uaba ko dasmer. Uiaba dikri, epe uiaba umer kak net eguatumur, abelelam lar dordor.

⁷ Abele kaimeg Iesu nasge Peteru detager, kega, Opole pedali. Simona Peteru asoli, kega, Opole pedali, E tabara uali kot ame (abelelam E no gem), E gurim eupamalu.

⁸ Kaier kaimeg giz tabakeuare kebi nar tumge (abelelam uiaba nole muriz geseplam, mokakalam fite eit fathom), net eguatumur gaire lar kem.

⁹ Uiaba gesepem tabarki, uiaba ur dasmer, a lar tumge, pako leuer.

¹⁰ Iesu uiabi detager, kega, Uader lar kei tais uaba asaperem peirdi.

11 Simona Peteru ekauerelu, a net gesepem eguatumulu, mitkar au larlam, uan handed a fifte thri: a net nole atoat kak au larlam.

12 Iesu uiabi detager, kega, Tabakeuare, leuer aroare. Nole nerute uiabelam kaimeg giz saserimem abim eutumer, kega, Ma nete? abelelam uiaba umele Opole dali.

13 Iesu tabakeamulu leuer ais, a uiabi ikuar pako lar kem.

14 Abele thri Iesu tababu natomertare uiabim kaimeg giz, keubu E eded akaida eudelam.

15 Uiaba emetu eroare, Iesu Simona Peteru detager, kega, Simona, Iona ra uerem, ma kari lag uiabi tumge? E abi detager, kega, Eko, Opole; ma umele kaka mari lag. E abi detager, kega, Kara kebi mamoe giz darasisiare.

16 E iako neisi abi detager, kega, Simona, Iona ra uerem, ma kari lag? E abi detager, kega, Eko, Opole; ma umele kaka mari lag. E abi detager, kega, Kara mamoe giz darasisiare.

17 E iako thri abi detager, kega, Simona, Iona ra uerem, ma kari lag? Peteru okabatageli abelelam E thri abi detager, kega, Ma kari lag? E abi detaut, kega, Opole ma umele gaire lu uridili; a ma umele kaka mari lag. Iesu abi detager, kega, Kara mamoe giz darasisiare.

18 Ageakar, ageakar, kaka mari natager, kega, Ma makeriam emeret mabu eso, ma bakeam mabara lag: ma aule mabara tag nagisi, a nerute ko mari uanaso, a mari uanagared abele ma nole la kak.

¹⁹ E abele detager, abara tonar eud etomet Ade despili. E emetu abele detager, E ko abi detager, kega, Kari narmili.

²⁰ Peteru egreamalu, a dasmer abele kaimeg Iesu nasge, E irmili ko; E dali Iesu ra marmot ge uteidilu ki ge eroare, a detager, kega, Opole, nete ko mari keserkeser?

²¹ Peteru abi dasmer, a Iesui detager, kega, Opole, E dali nako?

²² Iesu abi detager, kega, Ese kaka lagelag E kari naokaili, nako abele marim? ma kari narmili.

²³ Abele mer ekoseli uiabim keimer giz, kega, Abele kaimeg le nole eud kak: Iesu nole abi detager, kega, Ma nole eud kak, epe, Ese kaka lagelag E kari naokaili, nako abele marim?

²⁴ Abele kaimeg le E ageakarem abele gaire lu, a abele gaire lu detali: a meriba umele ageakar abara ageakar.

²⁵ Dordor gaire uader lu Iesu de ikerare, ese detali uridili, kaka dikiapor nole abkoreb gesepem gaire jauali. Amen.

Richard Clay & Sons, Limited, London & Bungay

Meriam Mir Bible
The Four Gospels in the Murray Island or Mer
Language of Australia

Public Domain

Language: Meriam Mir (Meriam)

This Bible translation is in the Public Domain (not copyrighted) due to copyright expiration.

2023-04-03

PDF generated using Haiola and XeLaTeX on 22 Feb 2024 from source files dated 31 Aug 2023

333cd95a-a1c6-5b40-8ad9-641bf00decad